

杏
花
邨
志

杏花邨志卷之一

邨人

郎遂

編輯

池州杏花邨在羈治之西立名不知昉於何代自唐刺史杜牧行春後名始著清明一絕凡樵夫牧豎無不取而歌咏之或曰邨以杜牧之詩傳實杜牧之詩以邨傳也相傳盛時老杏萬餘株連邨十里炫爛迷觀誠勝景也至今顰井大塘諸地皆以杏花名邨其邨境不只限在今之一區一隅也粵唐迄明興廢不一嘉靖間一興於羈丞蒲州張公邦教天崇間再興於羈守歸安顧公元鏡若建亭鐫石

爲杜老標靈有邑宰江陵李公一鳳成都張公燦垣咸文
采風流頡頏樊川者嗣後杏花零落酒社烟荒蘭亭金谷
同一蒼涼矣至我本朝三韓鎔公光美鳴琴之暇留意
山水奉罷伯金州喻公檄捐俸種杏爰擬重開亭榭修復
舊觀尋以行取入都竟成缺典猶憶從來蒞茲土者多

當代名賢鉅公倘杜牧重逢山川景物當後先輝耀余因
新立邨志以俟來者會雲間錢子墨巢結廬秋浦以繪事
妙天下最愛杏花邨川原幽異於是細加品題廣哀繪素
列諸簡端令世之靈運少文輩各手一編以志快舉云爾



𣎵

𣎵

𣎵

𣎵

古牛吳非象







牧童遙指犢
紅杏添新色
黃鸝憶管音
遠上層樓好
鳥解吹簫
偷得餘閒杜
官錢換酒
庾

顧元鏡句

吳非書

小杜行
春圖



ス
ニ
市
リ

ス
ニ
一



光
信
刊



石鏡




琴天寄張





香奩






尊勝幢
尊勝幢






李公

香鑄
晉鑄





三石
三石






石鐘







青琅玕



董公西鑑



貝葉





玉壺冰






竹冊

杜鵑
鵲歌



桐圭



桑柘月橙



漢
壺
首
瓶





周雷柏鐸

康熙乙丑年仲夏畫於
蝶蓮軒

墨巢錢又生



杏花邨志卷之二

邨人

郎遜

編輯

邨中

名勝

湖山

在杏花邨登頂俯眺大江如縈帶焉飛帆上下宛似鳬鴈頂上平曠昔建有亭臺今廢宋朱熹九日登

湖山用杜牧登高韻得歸字詩曰去歲瀟湘重九時滿城寒雨客思歸故山此日還佳節黃菊清樽更晚暉短髮無多休落帽長風不斷且吹衣相看下視人寰小祇合從今老翠微按晦菴本集詩題謂九日登天湖人固指爲平天湖作但於登字非宜况九日必是登高非泛湖也今正之明孝廉余翹湖山詩曰乘高何處望眸開載酒湖山藉艸萊烟裏夕陽無限景歸帆落鴈蔽江來休寧程梧九日湖山詩曰令節逢重九黃花雨後

繁晴光浮島嶼。秋色迥乾坤。詞賦徵高會。茱萸泛綠尊。
登臨興不劇。新月照前邨。貴池吳應箕登湖山頂詩。
日出卽偏宜。曉盤旋得幾羣。雨峰相澹遠。天地始氤氲。
積暑朝能散。平湖水欲分。因高閒指點。江影劍爲紋。
清侯官陳肇曾九日湖山登高歷游西郊諸勝詩曰。極
日遙看樹樹秋。萬家烟火望中收。厨分香積尋僧話。杯
倒玄醪散客愁。別島嶽巖浮遠岫。大江浩渺接長流。臨
風醉後頻歌咏。豈讓龍山昔日游。又曰。山色波光入畫
圖。平疇千畝不徵租。黃雲極塞連燕薊。白日橫江斷楚
吳。遠浦愁看生薜荔。故園遙憶插茱萸。猶存古井供泉
釀。知是黃公舊酒壺。又曰。颯颯楓風起白蘋。勝游攜榼
遠招賓。共敲詩句酬良讌。細聽經音絕幻塵。法界三千
瞻鐵像。王城丈六現全身。當年曾落參軍冑。此日誰欵
爛醉巾。又曰。開襟勝引倒芳樽。密坐高談日易昏。似爲
黃花邀旅客。寧愁綠艸滯王孫。嶙峋迴眺峰爭列。洶湧
驚看浪欲奔。但問酒家隨處有。何須偏指杏花邨。武
進林搏雲湖山積雪詩曰。高眺湖山雪。瀾漫玉作堆。潔
光涵霽月。皜質映寒梅。石谷述青藹。松林帶白皚。小溪

渾凍合。塗衲隱三臺。江都宗觀湖山詩曰。秀山門北勝。帶部卽湖山。夕照濛濛亂。秋空葉葉斑。鳥歸寒浦外。僧出斷崖間。從此驅羸馬。相期數往還。梳山危峽壁。湖山和宗廣文詩曰。路指平橋轉。招尋湖上山。幾家成聚落。萬木染霜斑。登眺無多地。川原盡此間。艸菴林杪出。僧帶白雲還。邑人吳非湖山詩曰。每欲登高頂。蹉跎乃至今。俯嗟城是舊。斜指樹重陰。江影分南北。湖光見淺深。一亭如可立。風雨卧欹岑。金細湖山詩曰。恣情登眺處。高絕是湖山。每到三春候。來棲十畝間。晴峰圖可畫。江水曲如環。聽得鐘聲近。相期叩梵關。懷寧蔣瑤過湖山吊郎仲久處士詩曰。孝友人居古杏邨。滄桑變後暗銷魂。至今烟樹城西路。每吊湖山夜雨昏。又曰。息影園林處士風。夜深三尺有孤桐。知君去後傳高躅。舊址黃墟夕照中。又曰。戰艦橫江沸鼓聲。隻身絕險下孤城。談諧忽中通侯意。寸舌能回百萬兵。又曰。拜辭開府謝登壇。排難功成不受官。最是射書人既老。淒涼天寶話辛酸。自注通侯謂寧南侯左良玉開府指程公世昌

虎山

與湖山並峙。山巔淺艸如茵。湖光山色。城郭烟火。交相映帶。游人歷此。心曠神怡。山列中台。明青陽王

良相虎山晚眺詩曰。極目望烟迷樹色。倦飛山鳥宿高

枝。招提清磬流燈火。返犢從人到竹籬。邨叟郎深虎

山看楓葉詩曰。杏花邨畔虎山斜。菴結山阿埜樹遮。每

歲經秋霜染後。滿林紅葉燦雲霞。清連江陳元鍾同

友人登虎山絕頂詩曰。湖山台並虎山台。俯視平原一

繡堆。迭迭清風高士墓。超超古木讀書臺。江峰隱見桐

廬影。天界空濛鸛鵲來。作賦有君雙妙手。杏花新種待

鴻裁。蓉城江表望虎山。楓葉詩曰。莫道秋光老。秋光

散彩霞。四邊山滴翠。一望葉如花。映日紅深淺。經風帶

整斜。落交流水際。誤認引漁槎。郎遂登虎山。訪竺厓

上人。便過族祖國。寶公墓隴詩曰。偶乘春日。出郭興

偏狂。依徑尋僧去。穿林弔墓傍。有懷葺小圃。還擬鑿方

塘。安得樊川出。重來問酒場。

鉢頂山

在演武場後。亦名笠山。以上三疊峰起。總名三台山。前

山。閩連江陳元鍾和趙客登鉢頂山詩曰。山前

山後水居邨。邨柳邨花處處門。祇見烟霞歸海嶠。寧分
雲樹問江源。六朝陳跡碑堪讀。萬里同心共論。最喜
趙宗家有鳳。間從登嘯一窺園。郎遂攜兒登鉢頂山
詩曰。登巔遙指古花邨。望子新縣幾處門。埜竈頻年屯
柳砦。浮家何地覓桃源。閒游逢衲資談笑。往事尋碑細
討論。最嘆穉兒貪眺覽。思移老樹種家園。

芙蓉嶺

在三臺山之間。東汝布衣楊森喜杏邨。又人招
游江祖石。以平橋阻舟還集三臺。共用船字。詩曰。

萬羅蒼翠遠參天。望裏虛回載酒船。木杪有臺供選勝。
峰頭無路與游仙。青看隔水羣山抱。碧蔭當空茂樹偏。
只是醉餘惆悵處。大隄芳艸石橋邊。天臺飯牛奴甯
淇斐前題詩曰。清溪十里艸芊芊。我友招游五月天。水
荇風牽真似帶。石梁潮淺不通船。開樽且傍山腰寺。放
眼仍看洞口烟。乘醉獨留郊埜宿。杏花邨裏聽啼鶯。
古牛耕者吳非前題詩曰。芙蓉塘畔泛湖船。江祖遙招
一石縣。橋似樵橫飛莫渡。指于亭際坐成旋。載回酒具
人皆醉。合拍歌聲客自傳。四面山光高列嶂。日斜雲影
畫圖烟。

西湘

在聖母橋下有溪水流入湖。明新安吳騭西湘踏青詩曰。新晴邀出部。林氣喜親人。殘艷精神復。蓮芳韻致伸。酒因古魄醺。蹟向獻徵掄。代謝難湮事。千春尚可鄰。郎遂寄懷王。葛源詩有十載好子。栖杏鴈西湘。常到子猷船之句。

茶田嶺

亦名棲雲嶺。近西湘。昔人品杏花邨十景。茶田麥浪其一也。吳門錢宗聖麥浪詩曰。風高蹴浪擁流烟。巨浸空涵四埜田。看去波濤原縹緲。聽來湧湫不潺湲。漁人誤訝添春水。蕩子終難繫畫船。附上柳條相俯仰。遙疑錦纜望中牽。

清涼境

在西湘茶田之間。漢陽詩人李必先游清涼境詩曰。倚杖陟湖山。步入清涼境。烟外得鐘聲。雲中見僧影。松風六月寒。花雨三春冷。未足登臨情。攀蘿窮絕頂。離岸余心傳。清涼境詩曰。菴結當山徑。亭空古路傍。艸青彌埜望。松韻入風長。飲酒同人醉。烹茶借佛香。相從呼我輩。攜手兩三行。

建置

杏花邨坊

在演武塲前左右各一明郡守顧元鏡鼎建後存其一清郡守顏敏新之易名牧童遙指處康

熙已酉郡守卽世純重修里人請還舊名甲子冬喻郡守太母喪車過折毀乙丑冬郡丞周公重建有紀事詩

杏花亭

在演武塲前嘉靖中郡丞張邦教立崇禎初郡守顧元鏡重修順治乙酉毀于左兵嘗聞之父老云

亭額書悠然見南山句又曰有花有酒亭聯則馬嘶芳艸地人醉杏花天也皆顧公所取可想見遺意及流風

之盛蘭水孔興嘗杏花亭望詩曰西岡迢遞一長亭俯眺羣鷗浴晚汀艸長湖平千頃綠松移雲度萬峰

青家家飛杏浮新釀處處垂楊伴野萍訖是閒亭無限意遠江高枕愈宜聽郎遂吊杏花亭詩曰亭臺花柳

畫圖中千載風流憶顧公一自烽烟戎馬後空留詩句付邨翁

陸舫

在杏花亭前明貴池令成都張燦垣立今廢青浦錢又選次孔振聲韻憶陸舫詩曰陸舫重開構小亭

坐看鷗鷺下漁汀。山容入眼春雲白。湖色侵人墊艸青。
君對名花揮彩筆。我將浪跡逐飄萍。何時問酒樊川鴨。
牧唱漁歌醉共聽。

湖山別業

在湖山之麓恭川李氏肄業處也。今廢。明廉使余敬中湖山書屋聞杜鵑詩曰。亭高徑曲綠

成圍。

山色湖光接翠微。收得無窮春意在。祇愁林鳥喚

春歸。

孝廉余翹題李茂才湖山別業詩曰。竹樹陰森

雉堞齊。

湖山亭館足幽棲。坐聞啼鳥聲頻變。行傍深松

路屢迷。漁舫遙穿葭浦外。酒旗斜拂杏邨西。知君未是

林泉主。多恐長安驟馬蹄。

乘雲齋

在湖山南麓名花古樹皆伐爲薪。惟綉毯一株古幹猶存。游覽名人多詠之。齋前有洗心池。翠竹千

竿環于水際。

今亦俱亡矣。孫登孫訪乘雲齋主人不

值。詩曰。

乘閒出郭訪張華。一徑山邨半落花。春水半湖

芳艸沒。

晴郊夾道綠楊斜。雙扉燕雀高人宅。四壁圖書

處士家。

空與叩門相問訊。不知何處泛仙槎。又曰。綠槐

深處戶常關。乘興來游興盡還。官路馬蹄侵埜色。長林
鳥語破愁顏。面空莫問邨中酒。日暮休貪郭外山。祇此
且酬佳節去。遲遲重與約躋攀。 鐫廷鑒喜甯崗過乘
雲齋詩曰。秋山寂寞獨幽居。埜客同來興味疎。自設南
州高士榻。可無太乙聚星書。談因久劇頻聞雁。卷亦常
開偶見魚。相對共拚今夜醉。莫令風雨獨愁予。

湖山堂

卽乘雲齋故址杞林方以正招而新之落成之日
載酒問奇者趾相錯同學李銳郎遂輩嘗會文於

此。吳非同趙客過湖山堂爲方廷御留題詩曰。大地
皆爲客。行行亦偶來。湖山時自勝。艸木待誰開。構寫書
高屋。堂空月近臺。前邨應問杏。隨意足徘徊。 郎遂題
湖山堂詩曰。杏花邨最勝。登眺有名巒。愛爲開亭榭。閒
曾問井幹。風高松屢颺。雨驟水湍湍。願作湖山主。烟霞
分我餐。

淨林

在虎山之阿。明學博歙州胡虞支題額萬曆間高僧
妙光行脚來池郎子棋嘗飯之與之談禪甚得因以

學圖地建菴迎居之。明郎才過虎山淨林聽子規詩
曰。余生性愜水雲居。爲探新音步履徐。春老桃花紅粉

褪雨過蕉葉綠蘿舒。坐乘好鳥當簷喚。話到愁腸逸興除。世外風光看不厭。共君笑傲復何如。清杉山釋元柏淨林坐雨呈竺崖上人詩曰。隻杖天涯半雨程。虎山何意且留行。縣燈靜夜翻經誦。鋤地清宵本衲情。林外雲陰隨鳥去。湖中秋影逐帆征。玄關掃盡浮生事。擊竹拈花磬一聲。廣陵吳壽潛游淨林詩曰。無端作客愁難遣。偶爲尋幽興漸舒。路近不須拖竹杖。山平還可省藍輿。峰青縹緲烟開後。江白分明日落初。望盡欲歸仍小憩。蕭閒吾甚羨菰蘆。湖州馮鼎延飲淨林菴樹下同趙客分韻詩曰。次第樽開坐樹傍。野田流水燕爭將。漁郎歌起山雲白。騷客詩題邨酒香。麥浪烟輕啼杜宇。菱波風細狎鴛鴦。醉中欲問浮生計。幾度殘鐘下夕陽。

三聖菴 在淨林右祀林方氏建康熙初住持僧竺星募衆重修。明沈昌三聖菴詩曰。道負離騷屈相尤。障天雲霧勢難開。沮羅一覺江魚寤。直到于今喚不同。玉田釋性壽詩曰。淨林鬱鬱月踈斜。三聖于今共一家。竹院山房人不到。蘭盆始啜趙州茶。

窺園

在昭德坊明董模築有圖有序有詩詳見藝文新
安潘之恒窺園記曰曰窺園者何居歙州學博董子

修先生模讀書處也其地在杏邨湖山間昔漢儒董仲

舒學不窺園先生則而效之曰吾以吾之窺學吾祖之

不窺也蓋池郡近鄣有兩山而齊山最著若以唐刺史

杜牧之詩游轍至今填谷冠蓋雲集視若郵舍殊減兩

姦人呼爲小九華謂其近且似也先生語余城西湖山

下臨白浦鏡波倒影空碧玲瓏古剎隱居稻畦林薄點

綴如黃公鑪泉可用汲覽眺鐵佛寺吊古文選臺而杏

花邨有清醑可沽皆以勝麗吾園而坐收之蹊險渡深

則有杖可扶有艇可刺有藥可刷有奇可搜吾以日涉

而窺其奧故命曰窺園也先生之仲子無爲氏好古博

洽能世其經屬余及呂樂師爲之記其勝遂逾齊山而

上之今游池陽者知有湖山問主於窺園則興盡觀止

不必更有所詣矣夫九華齊山非不奇詭霧異而以人

鑒其天湖山曠遠清虛境若隔凡吾願子修先生之秘

之也他日經華齊兩山無從避囂吾必以湖山爲吾廬

矣君家祖傳惟不窺園乃能窺天人之際先生窺之以

完湖山之真。而後徵杜牧之以詩。累齊山也。子修尚終
秘湖山。請削三記。母爲游客所窺。而聚囂焉。可爾時萬
曆戊申夏五。郎遂跋窺園圖記。卷曰。余輯杏花邨志。
於園林亭榭凡遺址。必特書重先賢也。董敬菴先生。模
築窺園於湖山之麓。與先郡丞文韶公。煥園相密。邇先
生課令子讀書其中。嘗與名流觴詠。一時酬倡。不減南
皮鄴下。厥後滄桑變更。斯園幾易其主。今先生文孫商
侯。謹守此卷。余偶一披閱。不勝欷歔。因採園之記。若詩
錄入邨志。以傳一掾一石。終不忘爲董氏有矣。雖歸他
姓。亦僅同守薪之吏。灌園之丁。爲護往蹟而已。壬戌秋
跋於虎山淨林。郎遂吊窺園詩曰。十載下帷曾此地。
何嫌業就一窺園。遺文收入名山注。易代蕭條跡尚存。
懷杜軒。在鹵郊外面湖文學郎。士昌授徒處也。士昌甫弱
冠。卽坐臬比。稱經師。一時高弟子皆以文章顯。淵
源家學。蓋有自也。姪孫遂題元臣叔祖懷杜軒。用擬購
別業原韻。詩曰。杏落邨空慨廢墟。惟君世守舊茅廬。
尚存詩畫留餘筆。頻向園林荷有鋤。花艷閒情宜放鶴。
湖波新漲好觀魚。不須避世求深谷。卽此幽居亦自如。

煥園

在杏花亭左。宋奉議大夫郎文韶入元，隱居于此。子族屬皆文韶公裔也。煥園遺址大半荒蕪，擬重構數椽，用承先志，預以詩聞同人倡和，別彙成集，茲錄數首以傳舊跡。郎遂原倡曰：先人遺得舊邨墟，三徑依稀好結廬。燕待我呼將杏補角，同誰叩帶經鋤。客談憶古黃墟酒，觴侑隨時白浦魚。貧士家風徒此志，無田負郭也何如。閩中陳元鍾次韻詩曰：選勝荒林贖古城，杏邨原有隱賢廬。曾栽松菊三開徑，爲愛藤蘿一倚鋤。山水豈無真主客，風雲未肯渾龍魚。於今更作南陽卧，抱膝長吟且自如。宣城施閏章次韻詩曰：多少名山成古墟，披荆誰是讀書廬。西郊勝地隨堪築，南畝荒烟尚可鋤。種杏却因邨有酒，隣湖莫謂食無魚。他時招我衡門下，共賦棲遲如不如。廣陵宗觀次韻詩曰：小閣擬築帶平墟，梧竹濃陰貯酒廬。讀史定知供辨難，避人還復理畊鋤。山坡花暖飛黃雀，湖蕩船開到鯪魚。自分白頭秋浦客，團瓢相傍問真如。桐城方亨咸次韻詩曰：小築君家舊有墟，杏花深處可爲廬。循簷好種吟風竹，傍隴堪揮待月鋤。剥啄無驚常放鶴，泳游何事但觀魚。

尋常醉卧黃鱸酒。名利長安總不如。吳門金佐次韻
詩曰。小杜行春到古墟。存亡幾度嘆衡廬。牧童歌咏還
吹笛。田父紛紜尚荷鋤。坐嘯林中驚宿鳥。泛舸湖上釣
游魚。從君寄傲耽幽興。把酒微吟亦自如。婺源施劭
生次韻詩曰。幾度塵氛幾作墟。看來還剩半山廬。離離
樹古邨遺杏。莽莽丘荒月荷鋤。刺史行春何處酒。高人
食客有時魚。寺鐘響徹同人雅。鐵佛聞吟可自如。楓
菴章世德次韻詩曰。荒烟零落古邨墟。招隱何人復舊
廬。園韭却因狂雨剪。田禾可傍惠風鋤。當年刺史曾尋
酒。此地昭明最愛魚。堂構不忘成繼述。賦詩言志竟何
如。毘陵林搏雲次韻詩曰。杏邨何必嘆丘墟。羨有蘭
森護舊廬。上苑早占輝夜乘。平湖遙對狎春鋤。酒傾北
海投車轄。書滿西園老蠹魚。况是情深千尺木。不因零
落棄相如。宣城鍾允鰭次韻詩曰。城西深處古烟墟。
中有先賢舊艸廬。百戰風流遺世澤。幾番興廢荷耘鋤。
門高巷曲遲車馬。水繞山環羨鳥魚。共憶當年賢刺史。
翰君賡咏復何如。金陵孫印次韻詩曰。高隱傳來古
廢墟。羨君重理舊茅廬。杏花細雨春多種。芳艸輕烟曉

自鋤香散長林深。酒盞波澗片月引溪魚。當年小杜今猶在。敢教微吟亦不如。鎬漢系次韻詩曰。偶念邨荒宋代墟。擬添花柳輒成廬。一枝復舊君推引。三徑重新我荷鋤。自有湖山籠玉案。將期奕葉袋金魚。却憐杜老題詩處。遙指從今邈不如。白注。煥園舊有聯云。世守衡菊江黃甲。高和韻詩曰。此地爭傳杜子墟。祇今誰復結高廬。可知山色原無恙。賴有邨花尚自如。卜築幽閑三徑草。開罇風雨一牀書。君家出處應遺俗。何必桃園羨老漁。蓉城江表和韻詩曰。荒廢何年舊草廬。重開將復理芟鋤。感時風景千秋恨。閱世升沉一卷書。躡屐看山誰畫筆。結隣沽酒是樵漁。花邨領畧能為主。志在應知用有餘。赤濱檀車詩曰。數椽高築敞湖天。贏得名園勝輞川。酒續黃墟千萬斛。書增文選六朝篇。郊原月色盈秋水。梵刹鐘聲落暮烟。好待結廬還補杏。杖藜常此醉花前。豐泉陳之蔭步韻詩曰。城外層樓望遠天。雲山環抱水平川。何人作賦工梁苑。有客題詩續杜篇。月鎖花邨千樹老。雨連芳艸半湖烟。石渠擬構傳經處。閒聽漁歌夕照前。宛陵邵岑中訪煥園詩曰。三載馳

驅到杏邨。綠陰森樹靜衡門。頻來語燕偏留客。忽聽歌
鶯數喚。詩賦爭傳千古事。址墟猶見斷碑痕。同人握
手多興感。日落卿山烟霧昏。石城金緒遇煥園廢址
詩曰。環城何處不堪居。欲傍荒郊結草廬。紅杏已非思
杜牧。青州誰復憶相如。依稀雲樹愁無限。寂寞園林憾
有餘。爲問辟疆成別業。邨時開閣擁奇書。蘭水江一
經過煥園有懷。郎仲久徵君。詩曰。名園洛水亦丘墟。秋
浦還傳處士廬。許友不忘吳季劍。揮金堪並管寧鉞。杏
花風釀時招客。蓮社輕撓獨釣魚。憶昔立談弭悍帥。解
紛聊矢可相如。石埭蘇曙贈煥園主人詩曰。郭外邨
莊西復西。花開二月轉黃鸝。酒帘依舊當墟挂。牧豎猶
能指路迷。日下紅翻疑苑近。雨中錦簇覺墻低。主人夙
有耽幽癖。小杜風流應與齊。杜鵑釋通繁訪煥園舊
址次韻詩曰。名園何處訪幽徑。隔城斜臺已埋荒艸邨。
猶說杏花林深藏梵宇。烟晚散人家。過此懷疇昔。風聲
亂暮鴉。陵陽周常有過煥園舊址有感。寄郎趙客詩
曰。來往城西路。逢人問講堂。平湖客眼放。遠岫入雲
邨。著原于杜籍。屈信有郎花。餘雖落落。可復舊時芳。

演武塲

在鉢頂山麓相傳舊在小路口之南後移建今址明萬曆間兵備副使馮叔吉拓而新之前建上游

節制坊中建教機亭傍建將臺左右建府衛康熙癸丑年游擊楊勝捐俸重修今廢蓉城江表杏花邨同友人較射詩曰射鵬曾得幾人同愛把磨膠燕角兒臂影一彎爭畫月星流百尺欲批風人家多在春林外客興偏餘晚照中且向青帘沽一醉杏花還憶舊時紅

關帝廟

在鉢頂山其左有火神廟右有馬王廟俱康熙癸丑年池陽營游擊楊勝重修明貴池方儀鳳甫學

爲儒家言至三十六欲去文學武從涪溪山中投宿杏花邨關帝廟求夢兆是夜神果見夢越二十年至萬曆丙辰科乃登第一人官至南路副總兵掛冠歸壽八十一生平所歷皆于夢不爽或曰儀鳳少讀書僧舍每嫌經聲聒耳屢止之不可因戲題一詞有齋公寡婦之語蓋僧舍爲寡婦所建也一夜夢神示之曰子當大魁天下今以此語損福矣然子功名未艾從業可耳儀鳳因求夢于關帝後棄文習武舉殿試第一然則一言之戲遂

令功名分途因附識於此

乾明寺

在小路口西北名原於唐宋紹興五年重建唐有西禪院久廢後又興有羅漢堂明萬曆丙午邵守

黃流芳欲徙於湖心相公墩未果蓋郡脉自西來不宜重壓故也宋亦稱光孝寺今額乾明一曰鐵佛禪院其興廢始末詳明相國丁紹軾募疏康熙間住持僧清言重爲修復開堂接衆邑人郎大徵倡首募建前殿以祀關壯繆里人唐正清相繼募建白漢靜室庚戌間擬重建山門未果見石埭令羅浮姚子莊募建山門引宋楊振有乾明寺前古松詩見藝文 明晉熙阮裕游乾明寺題壁詩曰雨色空濛仲夏過同尋勝蹟興婆娑萬松飛翠巢烟鳥千竹搖青憂玉珂遍問黃鑪無舊酒頻敲清磬當新歌杏花仍有邨名在鐵佛於今體未磨 清桐城周南乾明寺訪白汗鄉師詩曰古寺背西部爭傳鍊佛名規模仍濶大戒律自分明老衲留鄉語游人見道情錫飛齊羽鶴夜半有鐘聲又曰茶瓜參半席坐破幾蒲團靜向此中息禪從何處安鬚眉應是假冰雪未

爲寒。回首白雲寺。長江一線看。會稽陶濠乾明寺詩。
曰。白公禪寂處。古剎倚林丘。紅杏邨邊發。清泉澗外流。
飛花落靜院。幽磬度山樓。似得匡廬意。仍來作快游。
郎垣和陶拜玉叅軍乾明寺詩曰。晴光搖翠壁。散步問
丹丘。林密乘雲合。花飛逐水流。傳燈開寶筏。煮火燦星
樓。已悟無生契。寧同汗漫游。又曰。何人開梵域。紺殿倚
雲丘。麥浪紋偏反。松風響欲流。雨花鋪作褥。貝葉疊成
樓。不盡畱連意。還期結勝游。豐泉陳錦宸乾明寺雅
集和呂箕詩曰。知己相逢賦采蘋。溪山爲主集賢賓。閒
探丹井尋仙蹟。靜叩禪關遠市塵。天外波濤難繫足。箇
中詩酒卽容身。風流謾侈叅軍帽。試看斜欹白接巾。
廣陵宗觀壬戌嘉平月邀趙客閒步杏花邨小集乾明
寺限花邨二韻詩曰。竹裏青帘帶淺沙。樊川興廢堊人
家。杏花零落邨名在。不比江山玉樹花。又曰。老僧送客
出關門。慷慨能將往事言。一自寧南兵掠過。至今烟火
不成邨。宗季智侍家大人限韻詩曰。步屨平林問酒
家。黃公鑪畔散啼鴉。南偏風景江城異。霜葉餘紅傲杏
花。又曰。日皎風恬冬氣暄。詩人往事幾經存。于今更有

郎君胃。何事郎郎屬杜郎。郎遂同鶴問師乾明寺。郎
席限韻詩曰。曠楚晴光映紫霞。小山厯落有人家。一從
杜牧題詩後。贏得郎名說杏花。又曰。鐵鑿聲傳堊寺門。
深林曲院欲開樽。沽來鱸畔何須問。牧豎無言過別村。
樓雲菴。在清涼境。明邑人沈昌樓雲菴詩曰。堊人盡日
倚筇看身世。無根聚散間。久向虛空渾汗漫。不成
霖雨也須還。泰州鄧漢儀樓雲菴詩曰。一坡層累上
絕頂。見茅菴崖竹頻搖翠。門松盡染嵐嵐招雲來。屋裏說
虎在江南。欲去尋秋浦。樵人路定諸。銅陵郎應微。兩
雲菴郎事詩曰。偶向清涼憇雲如。繞屋遮綠茶。勝碧澗
香飯。儼胡麻。心定渾忌暑。譚高欲雨花。老僧留別去。林
際夕陽斜。高田吳非詩曰。此去通秋浦。昔年祖道傍。
荒亭來往便。蘭若有無將。留客權為主。呼茶更飲粿。時
如初夏盛。松下果清涼。青陽江表詩曰。小立松林下
風清散午涼。奚奴迎夾道。堊衲禮深房。竹影當窓綠。茶
烟入坐香。樽疊且莫勸。畱以醉斜陽。張綰詩曰。一菴
樓嶺上。直欲接飛雲。竹翠千竿合。峰青四堊分。山僧能
黃茗。遊客且呼羣。頗覺清涼好。開樽醉夕曛。

古蹟

黃公酒鑪

杜牧清明詩所云牧童遙指處也相傳泉香似酒汲之不渴今演武場前有古井酒鑪遺址卽

其地耶所存井闌有舊篆今已泐矣游覽名人嘗過而憑弔之明大尹李岐陽題杜刺史行春處六字斷碑在井闌邊今尚存寶山姜烈訪黃公酒鑪詩曰空餘郵徑得名嘉何處園林有杏花谿嶺短塙漁艇繫山隈茅屋酒帘斜雲開大道催疲馬烟擁高桑住倦鴉楚客頻來尋故址萋萋芳艸是黃家羅溪李賜客中有懷黃公酒鑪詩曰十年萍跡徧天涯問酒尋山到處家每憶邨醪神輒往若逢寒食興尤賒黃公久冷鑪邊酒紅杏頻開寢裏花勝事喜今傳麗句高歌猶醉赤城霞全陵張惣游杏花邨訪黃公酒鑪詩曰片帆爲訪杏邨舊偏是冬深不見花想像詞人吟蒹藻徘徊楚客憶仙葩竹籬淡艷遲春日茅店輕紅散曉霞杜牧酒家何處是風流往蹟費咨嗟清溪朱之梅詩曰山城西望艸萋萋弔古郊原意自迷十里風光茅店裏一湖莖色小橋

低詩憐太守花應泣春憶游人鳥獨啼爲問黃壚何處
是卹農遙指在前溪蓉城江元嵩詩曰短牆茆屋柳
陰低搖蕩青帘一樣齊館似爭春堪宴賞坊疑碎錦愛
招携尊前紅樹留鶯語簾外香風落燕泥當日樊川遙
指處年年人醉夕陽西湖州馮鼎延詩曰水接城門
鷗鷺多幾家屋角倚山坡垂楊帘影踈搖雨遠寺鐘聲
半隔河杜牧詩留卹尚在黃公碑斷字全磨有人細述
當年事花滿平原盡綺羅九華吳世閱詩曰城郭人
民幾度終杏花猶放昔年紅遙思鐵笛吹名利因憶樊
川賦牧童酒索黃壚香未散書傳文選氣猶雄平湖不
管人間恨一色長空夕照中

昭德坊

在西郊今不存見宋人墓志

邵西禪院

在今乾明寺左遺址尚存南唐伍喬宋潘閬均
堯臣俱有詩見藝文

光孝寺

今乾明寺址見宋陸游入蜀記

西峰鍊笛 在光孝寺

西峰銘石刻 在光孝寺按鍊笛與銘石雖久不存以西峰故特書俾後人猶知有此也

鐵佛 在乾明寺宋紹興辛未年鑄 元檢討貢奎明宮詹周廷鑑俱有謁鍊佛詩見藝文 邑人吳非游乾明

寺鐵佛記曰出西門所觸目皆非其故矣左兵之後在

以礫址以艸也而古杏花邨坊表尚存今年秋主池州

者重理之更署書曰牧童遙指處行者惕者或曰去牧

童字可也或曰不若仍古杏花邨四字則以唐刺史杜

牧之絕句故也絕句選入千家詩本凡邨童子誦習者

無弗知因嘆息而過入乾明寺鐵佛像垂都坐地於

薨於頂高計二十尺曩者同劉徵君游但知其為萬曆

辛丑癸卯間修補空殘及宋紹興年月姓名大略而已

顧求所鑄之始不得也佛背塵積寸簞之有字可辨稱

都幹緣永平內院僧某敕幹緣賜紫沙門某以紹興

未二十一年十一月日鑄佛訖溯之建炎四年實高宗

南渡二十五年陸務觀生高孝光寧諸朝其游池州光

孝寺云。光孝卽乾明也。西峰聖者。當唐末吳武王楊行密時。寓池之乾明寺。逮去。留鐵笛付主僧。笛色似鐵。而非沈獻達所作。西峰銘石刻。兩者猶及焉。獨未一語連鐵佛。其文人稽古尚遠。不尚近耶。池陽集。又以鐵笛爲景德報恩寺事務觀見而云。然當不謬矣。冶金爲九周秦已有之。而高大范合者。工爲難。宋世子鑄丈六尺銅佛于瓦官寺。旣成。面恨瘦。工人不能改。時戴顓受艾達傳精佛像。迎看之。顓曰。非面瘠。乃臂胛肥耳。減臂胛。卽稱善相者。自知所損益也。隋開皇中。拜州釋子。激空鑄鐵佛。高七十尺。三鑄捨身而後成。轉世爲李嵩。造平佛閣。以覆鐵佛。以其異耳。紹興二年。宣州有鐵佛。高丈餘。自動。數日見者。怪之。契丹天祚驚。婁宿軍至。有精舍鑄佛。長丈六尺。委而遁。佛能作怪。乃不爲人護耶。今錢笛銘刻無聞矣。片石數行。惟記咸淳間修梵舍事耳。今不知寺名。光孝屬何時。仍乾明。亦稱鐵佛。貴池縣舊志。且併遺此寺不載矣。蓋寺之興衰。與世之變革者。斐焉而鐵佛則自高宗辛未迄於今。甲午凡五百又四年。予來游之期。適與鑄鐵佛訖之日。同。前長至五日。是爲朔。有

八日日歷適又與歲次同。吳非謁鐵佛詩曰：空偏多色相。冶鐵範猶堅。佛說吾何有。僧知誰與傳。紀年身可鑊。近事眼常懸。塾外招如我。牛鳴亦偶然。武陵給事胡永順題鐵佛詩曰：我聞佛法只虛無。範鐵形形事則愚。一切已云皆夢幻。半毫何處可儀圖。堅稱射利終非相。悟到真空乃是吾。試向如來叅密諦。大千止共此洪爐。和州戴本孝鐵佛寺詩曰：檀婆遠引岫。鐵佛坐窺城。古剎開蘭若。施年鑄紹興。當時忘國恤。此地忌僧楹。丈六身難動。空傳舊相名。自注：檀婆山名。當寺之前。銅陵余心傳詩曰：入寺因懷古。傳來未到今。水田衣是鐵。軀體度成金。論佛原無骨。諸僧各問心。禪堂高自閉。却客莫相尋。蓉城江表詩曰：是即人間佛。皈依何必言。範金多寶色。冶鐵世尊痕。梵韻林梢月。鐘聲花路岬。此中僧入定。客亦不敲門。汪漢同陳昌箕游鐵佛寺次韻詩曰：徑轉乾明面綠蘋。遠公遙候叩禪賓。談經戒觸當時事。執麈宜麾入世塵。色相幾曾空法像。江山自是寄閒身。勝游已足追千古。何必龍山笑脫巾。

秋浦亭

今清涼境是其遺址以路通秋浦故名宋狀元陳舜俞明貢舉孫象壯俱有詩見藝文萬曆間郡守

金本高率汪義民修葺

聖母橋

在西湘按聖母係明太祖勅封鎮泗州水道之神橋創於唐元至正十一年郡人管雲甫重造明萬

曆甲寅年司李秦懋義命西祠神首新之詳見碑記橋上有鱗魚石藏荊棘中橋下有遺愛祠祀田明郡守何紹正置祀孝肅包公後郡人卽以何公並祀祠在毓秀門內處士吳非西湘橋詩曰小水源如此橫梁渡若何元時碑已舊池乘志移多况接西郊境曾懷樂土歌春陰晴復穩來往幾婆娑

聖母橋元碑

在西湘亭內按是碑篆額者稱通議大夫池州路總管府達魯花赤兼管內勸農事知渠

堰事吉祥書丹者稱從事郎池州路總管府經歷劉初立石者稱提調官徵仕郎池州路貴池縣達魯花赤兼勸農事知渠堰事刺馬丹曰勸農曰渠堰則皆民事矣新安戴觿碑記見藝文

丘墓

唐觀察使張悅愚墓

在鉢頂山蓮塘張御史廷瑞祖塋也

評事劉仲昭繼妻杜氏墓

在杏花邨今失其處杜氏爲杜芑鶴曾孫女見西館家乘

宋奉議大夫郎文韶墓

在杏花邨見族譜

明御史劉永墓

在乾明寺前按永製錦里人洪武三十年歲薦由沅州郡丞陞授

監察御史許潛墓

在湖山下南陂有坊表今廢按潛在城人由天順壬午舉人登成化戊戌進士

贈承德郎郎銓墓贈廸功郎郎鈞墓

俱在演武場左虎山之麓

律師翠崖墓

在大鑄堂後墓碣尚存

別駕房宿墓

在杏花邨坊西南今族裔多以文學顯

明茂才郎汝文墓

在演武塲左田隴間汝文名子述在平少尹郎淪之子也少有慧才年十一補

諸生十三食廩于庠十六赴玉樓時人惜之業師丁日爲理學名儒親表其墓弔之者有曰傳經原父訓表哀勒師名又有曰文章推父子道義重師生可以窺見一班矣

孝友郎國賓墓

在虎山之陽國賓字光字有才名少與同里丁文恪紹軾柯咸虛之來讀書齊山得

得樓以科第相期許惜齋志以歿萬曆壬子太守李思恭嘉其文學孝友爲之立傳登府志傳略曰國賓貴池人補邑學弟子員小試名藉甚爲青陽令丁公懋建所賞識迎之邑署毫無關說事繼母孝待兩繼弟友所得廩餼絕不入私性耿介人有過輒以正言規之咸爲折服惜無嗣以終父題其墓

清四明山人梁魯菴墓

在清涼境魯菴名甸餘姚人早棄諸生逃于禪同吳游戎之官池陽

因寄寓棲雲菴以終方外友存真卜壤瘞之京衛吳捷謨志銘

邨南 邨之南兩湖繞於前邨之北三台負於後故建設等項無多非略之也

名勝

白浦圩

邨前湖名廣植蘆葦每當夏秋水漲可駕輕舟垂釣昔人品西郊十景白浦荷風其一也邑人曹維城白浦望蓼花詩曰平湖紅十里繁穗蓼花叢歷亂烟邨外凄清楚渡中夜搖沙浦月曉帶柳隄風一眺遙無際輕帆樣碧空

平天湖

在白浦圩外唐李白秋浦歌曰水如一疋練此地卽平天耐可乘明月看花上酒船明餘姚御

史黃尊素平天湖望蓼花詩曰江城四月蓼花開怪底秋光人坐來艷奪紅榴應見妬冷欺碧葉尚含胚長同候雁孤汀宿忽與啼鵲茂苑隈秋浦還知秋得早烟波容與爲酒杯銅陵太學郎奎正泛平天湖追憶廣虞小阮詩曰年年秋色滿平湖爛醉持竿共釣徒今日來游人去杳不堪回首問黃鱸清郡守喻成龍湖上詩

日。沙棠蘭漿遠水平。錦纜徐牽繞岸行。一盞兩盞月初
上。東湖西湖風正清。溪邊塔影和烟立。渡口鐘聲隔樹
鳴。涼露溼衣渾不覺。夜深始悟荷香生。雲間錢又選
湖上酒社詩曰。布帘一幅故飄颺。引得游人入醉鄉。臨
水風牽青荇帶。捕魚鳥歇綠蓮房。山雲片片秋能巧。荷
屋層層墊最涼。忽得醒來向西望。小橋楊柳掛斜陽。
連江陳肇復平天湖詩曰。平天湖上鷺閒閒。爲愛秋容
出秀山。埜菊有英堪對酒。游人何時杏開顏。郎遂平
天湖泛舟分三五七言體詩曰。湖山高湖水遙放舟輕
似葉。酌酒飲惟蕉。醉眼望迷新黛色。枯腸爲理舊風騷。

建置

萃月菴

在小路口西南
俗名俞家菴

古蹟

廣潤泉斷石

在杏花邨南瀕湖嘉靖間邨農得之田內邵
丞張邦教訪置演武塲前建亭榭以表之有

聯云勝地已無沽酒肆。荒邨忽有惜花人。按莆田曹能始廷尉所著輿地名勝志曰。池州秀山門外里許湖岸。甌有古井。闌上刻黃公廣潤玉泉六大字。蓋古黃公酒壚也。明九華詩人吳少友所輯樊川池州詩注亦述廣潤泉云云。所得石刻處至今父老猶能言之。明季左兵之亂好事者以斷石收移于秋浦樓。乙酉以後劉梅根州丞曾訪之而未得也。郡邑志皆稱尚存者亦留此以待後人搜求耳。蓉城姜寅訪廣潤泉斷石詩有勝地春寒花繡谷荒郊人散石遮田之句。

丘墓

明太子中允李賢墓

在小路口。按賢貴池人。由洪武十七年貢授蘄州學正。陞都督府斷事。坐

事編伍營州左屯衛。未幾以賢能保除兵部郎中。陞陝西左叅政。又坐事編伍興州左屯衛。尋以賢能保除監察御史。陞中允。雲南僉事屢進。屢退。喜怒不形。直道不變。九華徐俟發輓詩有黜陟初終直賢能喜怒忘之句。

名賢方時來洎妻貞節陶氏合墓

在小路口東南有墓碣按理學丁旦東方文學

時來書曰展誦來札熟念高情千里之外應之矣吾德其不孤乎昔賢云出家如初成佛有餘佛之成甚難而謂其有餘者深見初心之易怠也受翁居家一方英俊之輩過門不同盼者盲也金丹云如此分明如此直截當面放過真是無緣張橫渠兩程姑夫輩也勇撤舉此之意居然以未聞道自處試看古人真志實行豈尋常形跡所可拘泥吾契忍泛泛在甥列而虛推此老為母舅也哉世上有多少富貴之家同歸腐艸而瓢食簞飲纓絕肘見者至今與帝王卿相齊驅並駕是故志士不忘在溝壑也樂天知命學者豈但已乎郎遂過杏花邨拜方南極先生墓詩曰相從瞻拜到荒丘表墓當為片石畱節近清明追祀事遺書重讀淚難收自注先生抱白道之恨先大父其子壻也嘗有書言身後事又比相國園亭廢址連墓猶相近舊同研升沉隔世俱荒艸姓字文章盡不傳自注相國謂丁文恪公萬曆壬子會同修郡志

邨北

名勝

馬鞍山

在湖山側以形肖故名舊有湖山亭今廢 明貢元沈昌題馬鞍山詩有雕鞍解在碧嵯峨之句

建置

華嚴菴

在湖山東北之阿和州鷹阿子戴本孝笑額今不存 明九華吳光錫重陽前一日全王無技鮑晉

公元禮許季清李學醇登高小憩華嚴菴詩曰近部幾能到登高故早來望涵波漱澗秀聳塔崔嵬曲抱千家市平凌十畝臺背岡修竹隄丈室轉悠哉又曰下坡因小憩岐徑失前門茶到清如許僧貧不可論松蔭扶更遠菱唱晚愈繁明日攜壺出仍過杜牧邨 蓉城王良相前題詩曰登高無限興先日眺湖山雙塔浮溪外千家出樹間將峰青遠近與水綠週環竹密僧房寂蕭蕭晝掩關又曰却尋方丈室僧亦解供茶冷淡禪家禮參

差墊徑花。吼驚松作浪。影亂竹迎鴉。何必龍山安行歌。
昌已斜。銅陵余心傳華嚴菴。詩曰。日歸猶未暮。更欲
盡郊游。菴小山環立。門斜竹影修。客來休亦暫。佛在坐
何愁。羣鳥如栖宿。相呼自唱酬。賢池吳非華嚴菴。詩
曰。展無何齒夫。上下足曾安。不至行趨滑。能藏見曲蟠。
逃禪稱佛號。法喜導人歡。暫得閒僧話。明如起利竿。
青陽甯洪斐華嚴菴。詩曰。一菴藏小壑。真是老僧家。隔
鴈人烟靜。到門樹影斜。圖荒堆積艸。客去散鳴鴉。莫道
無供給。清談勝雨花。

西隱菴

卽華嚴菴地。順治間池郡紳士迎講師舍融居之。
劉廷鑾有序見藝文。邑人汪漢同孔仲石人初

陳中吉展侯游西隱菴。因贈舍融和尚詩曰。頻年懷妙
賞。此日得同游。臺榭依山靜。藤蘿挂壁秋。洞深人響
天迥。楚雲流。况有談禪侶。居然鹿苑幽。鐫延鑿南隱
菴。詩曰。聞已稱西隱。華嚴字未磨。孤僧閒倚樹。羣鳥亂
離窠。小坐聊休倦。清談亦解酲。浮烟連百雉。歸趁夕陽
歌。

三台菴

在三台山之西北爲女僧所居菴有秋桂數株花時多游女盤旋其下

也罷了菴

原名飄菴與三台菴相近四明有老僧行脚至池居數載示寂後潛川半禪道人寓此易今名

題咏俱逸順治間廢遺址尚存故云道人陳常題也罷了菴詩曰人無退後想着染將來魔識得當前境偏宜自在多

旗纛廟

在鉢頂山北嘉靖間郡守田賦建祀軍牙六纛之神今廢

古跡

桑柘門

在虎山東北唐時土城門路通古鱗口建德明經王自省杏花邨懷古詩曰山程行發從蘭水花

縣行吟過杏邨常似秋來唐以後因懷古往宋當論廢興時慨歸荒艸深淺湖波指渴痕不識酒壚依井立何人爲說土城門

丘墓

明太學張璉墓

在邨之西北桂花園按璉嗣子太春卽靖靖時從亡侍郎金焦裔也今族人嘗言之

州刺陳俊墓

在邨之西北下南沖按俊登永樂乙酉科附葬有陳橋墓兵備副使熊倅謨志銘

覺源和尚墓

在湖山北按覺源嶺南人萬曆間行脚至池州居城內祝聖寺坐一龕常十餘日不食飲

水而已一日徧辭寺僧曰某以十三日行衆僧意其它往及至期沐浴則跌坐示寂于龕中寺僧塋之於湖山

禪師丹霞墓

在華嚴菴山門前有塑像祀菴內

杏花邨志卷之三

邨人

郎遂

編輯

邨東

邨之東雉堞參差高宜登眺邨之西湖光
縹緲暇可垂竿凡名賢題咏特採列之

名勝

芙蓉塘

在弔橋下每當夏秋水漲荷香遍墊嘗有採菱舟
往來不絕處士吳非詩有芙蓉塘畔泛湖船之句

建置

秋浦樓

舊在治東按曹學佺名勝志曰李白詩秋浦長似
秋蕭條使人愁客愁不可度行上東大樓卽此宋

紹定戊子郡守趙范移建治西以路通秋浦也石刻東
坡詞山谷字於壁端平郡守王伯大易名秀山明正德
丁丑郡守何紹正增築磚城仍因之宋丞相趙葵有秋
浦樓詩見藝文 清康熙癸亥總河靳公輔以秋浦樓

景似瀟湘賦。試池州七學諸生建德王爾綱賦曰。維池
陽之勝地。亦江左之奧區。俯齊山而秀特。望九子如芙
蕖。臨清溪而弄水。俯鱖口而羨魚。自西南而逶迤。近百
里而盤紆。云浦流之所在。當秋景而尤舒。於是浦以秋
傳。州因浦置。實創始於隋朝。已咏歌於唐世。及乎邵邑
既遷。號稱互異。考古蹟而流連。慕佳名而寄意。傳趙守
之曠懷。亦宋時之韻事。燦乎東坡之詞。偉矣山谷之字。
此則秋浦樓之所自也。請賦其景可乎。其爲浦也。注洗
澄淡。洞淥淵泓。光清軒鏡。聲涵絃琴。岸花繡錯。山樹陰
森。菰蒲蘆荻。蒼蒼青青。荇牽紋而風淺。影映碧而雲深。
炫錦駝之希鳥。潛沉香之珍鱗。其爲秋也。叢桂吟風。兼
葭綴露。潭水收潦。烟光靄暮。同雁陣以回旋。共魚歌而
晚渡。望紫岫以淹留。舉木蘭而暫駐。月映浦則嬋娟。而
益皎。湖遶樓則汪洋而衆注。其爲樓也。丹分綺閣。翠奪
層岡。騶山川兮清曠。倚城郭兮昂藏。挹遠瀨兮浩蕩。吞
巨壑兮渺茫。望長提之綿渺兮。觀行人之絡繹。雙塔
之搖空兮。盼飛鳥之翱翔。光怪萬狀。烟嵐四張。目下
賞口莫罄。揚托諸比類。似此瀟湘。吾聞大瀟之爲狀也。

源高而勢激流長而氣清出九疑而掩映合施水而幽
湫颯颯兮寒花之發空谷蕭蕭兮木葉之下洞庭若夫
湘之爲狀也岸若朝霞沙如夜雪本陽海而潏洞入衡
山而委折雖十丈之深沉猶五色之具別可以數江上
之青峰尤宜對山間之明月由是一人永都二水會流
以襟帶乎全楚集佳麗於一樓覽圖經之所紀實顯敞
而寡儔何有乎三江之險與七澤之浮不謂秋浦近在
吳州風日似長沙曾聞李白之句溪山好圖畫復來杜
牧之舟固足以助騷人之逸興動志士之搜求而豈徒
攬景物以自適擊空明以遨遊也哉郎遂賦有序曰
秋浦去貴池今治西南七十里許隋以更不城而名縣
於水乎有取焉相傳樓故在今治所爲宋太守趙公范
增築而表之石刻東坡之詞山谷之字已失之久矣惟
丞相趙葵一詩尚存名勝志中而四時之景色如瀟湘
則至今如故也今某公試士以此命題余產茲土者因
摘毫而綴辭賦曰緊浦水之所自溯流溪於潞源山惟
高而澤沁接祁閭而與隣谿曲曲而匯聚雖細流其同
奔過石城而旋繞時潏洞以長清六朝來以稱浦隋治

縣而更名。何氣移於冬夏。風似秋而迄今。迺情繫於太
白歌。叠叠而侈傳。既如刻之嘆。讚復長沙以稱連。指清
溪以併及。久盤桓而未厭。後析宣而置罷。轄從附於湖
瀕。若登高而遠眺。亦巨浸其無垠。樓開巍於閣道。飛檐
牙而崇甍。凭闌縱以寓目。水四周而法云。或入宮而小
霍。圍南北之重山。列画屏如繡壁。變風雨而晴明。艸木
蕃而搖影。霧幻散而慶雲招。游涉之過客。多欣美於高
賢。每假借以品第。實無分於主賓。探瀟湘之二水。派各
導而朝宗。交著稱而廣泛。瀟入附而伏潛。樹接礎於涯
際。據勝槩於零陵。雖異地而比擬。景維水之幽艱。曾兩
不以相讓。誠池陽之大觀。稽南唐之宰相。素讀書於湖
墩。駕扁舟之一葉。肆所之而浮鱗。排九鼎於崑石。靜州
嶺於陽春。浮青嵐於遠黛。想大樓之栖仙。欲相邀而莫
致。欲遽進而莫前。開秀山之祖道。拾杏餘其花邨。眺杜
鵑而若近郊。迤逦其自西溪。分清於來去。中極目於千
天。挹秀色於九子。劍出匣於青冥。挂風帆而上下。忽一
瞬之靡定。挽瀟湘而會合。統長江而胥渾。亂日天地。安
化。秋何陳兮。流而不息。浦長新兮。浩浩蕩蕩。是殆足以

移情兮。而何別於古與今。宜興陳天策陽月西樓遠眺詩曰。爽氣西澄無盡頭。自來銷受有風流。樊川邨畔花餘杏。供奉詩中浦入秋。嚶鳥寒聲思破寂。篆虫殘字引尋幽。繡春如畫供凭眺。何日携筇一縱游。晉江陳寶鑰登秋浦樓詩有小序曰。江以池名。所謂漢水爲池者。耶。曰。貴池。曰。池口。曰。池陽。究竟以浦名。夫江共之也。浦池所獨也。夫浦古所謂步也。秋浦者。秋則浦也。非秋則沼爾。故魚步龜步以物名也。南浦露妃浦以人名也。秋浦云者。以其地蕭爽。四時皆秋。乎建樓者。誰宋趙范也。詩曰。池陽半水國。有水咸宜秋。天洗一湔月。夜沉雙玉鉤。鴈烽吹荻起。漁火溼烟浮。百里涵虛氣。暮朝浦上鷗。又口雖無霧。雀落而有貴魚池。蘭珮向誰解。玉簫漫自吹。千螺傳黛粉。一鏡貯蛾眉。昨夜添容色。莫愁暗度時。又曰。月與湖雙美。詞兼字共妍。舌回鸚鵡夢。筆起龍蛇眠。長嘯人千古。凌波鴈一天。不知興建者。安肯遜前賢。又曰。全括江山勝。天然貯一樓。黃池吞日落。碧漢抱城浮。清風帝子閣。花雨法王丘。寫獎秋頻渚。支持四百州。泰州鄧漢儀秋浦樓詩曰。一路埜花陰。城頭花更

深亂沙黃蝶舞。廢址白羊侵。負郭全耕鑿。連山自古今。
池陽風景地。戰後急登臨。宗觀喜吳園。次至集秋浦。
樓詩曰。每念離羣久。翻嫌客到遲。剪葵呼濁酒。倒篋出
新詩。岩壑身還健。風塵路各歧。西窗今雨夜。欵欵話鄉
思。去發三洲棹。來同五日觴。晚花明小院。新月繼斜
陽。粗糲留賓少。湖山托興長。君才原杜牧。題詠豈能忘。
弔橋在秀山門外。弔亦作釣。舊以木爲之。後易以石。明正
嘉間邑人方伯文檀龍祥相繼修造。據形家云。此橋
湮塞則居民受病。今日益塞矣。所宜亟疏之。錢佛寺悟
明釣橋晚眺詩曰。昔年橋上坐題詩。近作將軍飲馬池。
三里隙城荒艸遍。萬家春樹落花嫋。菱湖客渡風波上。
蓮社僧歸劫火時。極目旌旗遮白日。濯纓何處是旄旄。
社稷壇在弔橋頭。舊在貢院東。明弘治間郡守祁司員遷
今址嘉靖二十年郡守曾仲魁修順治癸巳郡守
梁應元重修有邑紳陳以運碑記。周繚以垣四正爲門
各一。其中爲壇。其左爲齋室。其右爲厨。爲庫。久廢。今康
熙巳未邑令劉公光美復新其門垣。祭期春秋二仲月
戊日

永懷堂

在坡上街南偏文學李莊別業也同邑丁相國紹

賦有詩見藝文 明懷寧甲戌進士顏右丞素宇
質卿永懷堂記曰池陽李君以臨有別業在秀山門之
外負郭而近萬曆甲辰春之十日余過秋浦李君爲置
酌邀余過草堂而憩焉余乘小肩輿從二三友至其地
甫入則見堂之所據者負山面湖其山不高不卑環顧
而拱向疎樹陰蔭翠竹交加其湖渟渟洋洋水菰而不
洩漁舟小艇出入於烟藹中而乍近乍遠湖之外環而
爲山山之峰隱隱內顧如侍者之有行列而兢兢弗敢
亂也堂之前平布而舒衍皆原田畝畝溝塍交錯農夫
樵子所朝夕而謳歌者也余曰樂哉此堂乎是可以假
息而薄遊矣已而視其所扁曰永懷堂儻亦有說乎李
君曰此余先大人讀書處也先大人玉臺公好學爲志
少而遊於泮壯而出於庠已而宦遊於四方歸來纔四
十月讀書於此堂至老不倦蓋自吾大父古源公洞達
性宗深明理道朝乾夕惕側身修己其在朝夕有日錄
在古今人物有論在知行分辨有論爲四方學者所宗
吾先大人日侍古源公之側耳熟而心維焉以是寅寅

無隋行而昭昭有成立故構斯堂而讀書其中每道述
古源公行履以示吾兒輩未嘗不流涕也茲者雲樹空
存德音不再羹牆若見九原莫追一登斯堂輒慨然而
悲肅然而恐又凄然而歎也所悲者家學淵源顯承相
望憫余小子僅承其世業而不能發揮其心源夫安得
而不悲所恐者前人天資高明志氣遠大然猶日資問
學兢惕不忘余小子昏昧不齒於前修怠荒不加於後
進茫茫宇宙未決底止又安得而不恐所凄然而歎者
風氣日靡流俗日敝吾前人在渾朴時猶然身自樹立
余小子日在風靡波蕩中曾無所執持古人云吾不幸
生於衰世所至幸者有元紫芝嗚呼彼紫芝公猶異姓
人也而遐慕之吾有家學有遺言逸行之可考而吾不
能遵行而接續焉又安得不凄然而歎乎故題曰永懷
堂以志吾思也余聞李君言乃謂二三同志者曰世道
之所以不至於泯墜者以恃有此心之相續也在前人
封之植之始足以貽後人之思在後人尋之繹之始足
以續前人之命家之有孝子國之有良臣此其培植也
今之士人乃兩失之鹵莽其心既乏可懷之蹟效尤其

行。益重陸緒之悲。若李君者。可以風矣。於是遂命僕人酌酒。孺子申歌。既登高而遠望。復臨流而徜徉。浩笑行吟。不覺夕陽之在山矣。歸來秉燭。次其言以爲記。附太倉學博李元胤序。李寄川雜集曰。余曾祖印山公。與寄川祖玉臺公。爲莫逆交。世講之誼。有逾骨肉。其父端如先生。魁梧磊落。不少俛仰於世。余自髫齡。卽心儀之。時接杯酒。聆快論。意氣甚豪殆。所稱非常人也。及端如捐館。寄川方在襁褓中。與弟仲素笑哭孤苦。賴諸父提携成立。攻舉子業。發憤下帷。視取青紫如拾芥。亡如數奇。徒負厥志不克就。既目擊多故。輒歛嗟憤。慨不求聞達。彷彿伯倫元亮風味。以詩酒自娛。栖遲一室。抗懷千古。任盡態極妍。真不啻浮雲之過太清也。先是余燕南先生。以名孝廉。屢蹶春闈。慨然有遺世特立之志。因齊山秋浦清麗絕勝。時駕輕舸。遨遊上下。天才橫溢。落筆星文。尤喜爲傳奇。其家童皆工於音律。每至風晨月夕。歌喉宛轉。雜以簫管聲。徹兩岸。顧而樂之。飄飄乎欲仙也。觴名浮齋。多所著述。行世。寄川於先生乃母氏所自出。嘗佩服風規。奉爲家法。至是亦以其名觴者。名其居。

室志不忘也。因是而思天地之間。小大畢浮。往來直寄。愚者不察。謬以爲真。乘堅策肥。戀不忍割。方自謂天下之至適也。而亡也忽焉。竟同草木腐朽。則何益哉。余遭逢不偶。絕意仕進。甘貧好道。惟手一編。今觀寄川。愈有以教我矣。寄川先世有古源先生者。文章德行。士林山斗。與甘泉陽明。倡道東南。爲理學名賢之最。至今俎豆不衰。寄川蓋學有淵源。窺於性命之旨者。故能蟬脫汚泥。清虛高渺。別有天地。難爲俗子道也。時癸巳季秋月。

丁相國園林

即拓永懷堂故址浚池築山極園林之勝俗稱丁家花園今已成墟存之志中後之人必

有與蘭亭梓澤同其歆歆者。萬曆己未六月二十八日。丁文恪公紹軾因遼事抗疏尋以疾告歸。日憇西郊小園。今歷數十年。父老嘗言之。集中園居諸什多感時語。當在此時。此地作矣。茲備錄之。題小園詩曰。昔題友人園。有年今看小。景却依然池。開綠注青溪。水石系青分。九子烟。又曰。不貪學士佩金魚。且坐蒲團看歲除。讀餘瑤瑤山堪眺。賦就芭蕉葉可書。秋日園居詩曰。門前垂柳集啼鴉。籬下黃花間白花。未有使君來送酒。且

呼童子去烹茶。園居偶感詩曰：近市元稱晏子居。將
生新徑此何如。明時避世非無事，莫擬移文到艸廬。
吳應箕題丁太史林亭詩曰：高居迥絕紫霄間，別啓林
亭離市闌。城上翠微通遠色，湖頭練影自成斑。鴻苞黃
石誰兼器，碧樹青蘿好鬢閑。亦解避喧非避世，誰云心
隱是東山。飲丁介之園中次韻詩曰：虛堂爽氣入深
秋，溼滿尊前翠欲浮。已辦乾坤開醉眼，却憐風雨接城
頭。佳時若爲宜人住，高會應能散客愁。潦倒不知更欲
盡，籬花山色任悠悠。恭川李達丁家別業詩曰：雲屋
開三徑，風亭隱一椽。市喧宜覆掌，岩削得如拳。鳳蓋迎
朝爽，龍鐘集瑞烟。看君襟欲遠，興在落花先。又曰：黃
春開座裁蕉客，待題迎軒連繡谷。鑿石影娥池，霞尾魚
朝變。風梢鳥夕移。圖書生事就，相過幾人知。又曰：卽次
開蘭室，尋常啓辟疆。苗長石自老，花小屑爲香。甕水翻
新影，閑籠待夕陽。招游輸意氣，取醉得疎狂。吳非平
丁相國園林詩曰：埜荒空嚮廢園蹤，誰復亭開文事供。
抗疏歸談前相國，權關休憶小司農。青帷芳艸心遺種，
翠有浮嵐目可容。簿錄未畱殘石古，幾忘姓氏主何從。

園以籍郎遂過相國園林廢跡詩曰支筇冒雨到池頭
廢址殘垣楚徑幽文杏亭中無剩紙名園墨蹟向誰搜

息園

在弔橋西北鄉先達陳以運課子讀書處陳錦宸

雷雷淡烟籠曉樹遲遲嫩日長園荒閉門靜欲塵氛掃
縱步閒惟宿艸鋤架上牙籤橫萬軸優游寧肯負居諸

自西艸堂

汪漢拓息園遺址易名今亦廢黃岡杜界有詩
今逸吳非題自西艸堂詩曰地傍城西問土

人方名義勝豈無因蓋茅也可通流去綿蕞何如表坐
陳心憶碎離周世澤面臨賜谷帝時春從茲屋下詩多

賦金石聲聲誦讀新陳錦宸同汪甥嗣畝讀書自西

艸堂詩曰滄桑意緒已蕭然拮据依稀憶昔年三徑乍

開人似玉一編重理坐無羶溪山別久驚新識花鳥情

親續舊緣環堵暫棲期共砥圖南知在自西前

半畝園

即自西艸堂舊址青陽羅山人隱於醫嘗種花於
此園之東開小徑通芙蓉塘山人自題曰離垢處

如剡亭

在弔橋西南今廢

古蹟

宋貢院

今社稷壇是其遺址宋南渡池州固有貢院試士

詳梅根集試門記爲市中心街之貢院作也按郡志宋紹興初本州設科試于景德寺淳熙戊申提舉周必正勅建貢院于市中心街東植八桂題曰八桂書院尚書陳太昌爲記嘉定癸卯知郡李駿移建秀山門外時貢額三歲大比應舉之士餘二千人以上春官者六經六人詞賦二人宋季罷試沈昌題貢院詩曰傳聞南渡急需才八桂湖山次第開從此青錢中萬選雲霄有路刊三台附試門記畧曰宋高宗建炎初駐蹕楊州念上人不能至行在詔諸道提刑轉運司選官卽置司州軍引試池州科試當自此始此謂類試亦曰潛試卽發解舉人以備省試者也然每疑池州近行都何不共試建康且二千人而取其人不亦少乎又嘉泰間臨安紹興溫台福婺慶元處池袁潮興化及四川諸州府共增解額一百七十名淳祐間淮南諸州郡歲有兵過命淮東州郡附鎮江秘試淮西州郡附建康試斷黃光三州安

慶附江州試然後知州郡各行科舉而得入人已多此
與今提學類考何異觀紹興初元以呂頤浩爲安撫使
時而治池州時而治建康以劉光世爲宣撫使時而治
建康時而治池州則池州轉運使或亦司無定治然轉
運主財賦而刺史蠹民瘼以之典解額又與今布按提
調無異咸淳初建康重建貢院於清溪南以爲大事則
池移貢院豈細故哉陳太昌記惜不善於篇夫畫地掄
才僻壤之儒得以甄錄固中興良法也自政和後舉人
不習詩賦紹興始復高宗以古今治亂多載於史經義
登科者類不通史將罷經義專用詞賦以呂頤浩之言
而止噫通史者果有益於治亂乎爲詞賦者果盡探史
氏之餘文乎神宗朝二程以道學倡於洛四方師之中
興後盛於東南科舉之文稍用頤說諫官陳公輔上疏
詆頤學乞加禁絕秦檜入相指頤爲專門侍御史汪勃
請戒飭攸司凡專門曲學必加黜落中丞曹筠亦請汰
用程說者並從之當時伊川子孫盡家池州而京畿京
東西河北陝西淮南士人轉徙東南者詔令於寓戶州
郡附試其後又試之國子監不知程氏子孫嘗應池州

試否紹興十九年詔自今鄉貢前一歲州軍屬縣長吏
籍定合應舉人以次年春縣上之州州下之學覈實引
保赴鄉飲酒然後送試院及期投狀謝保者勿受夫先
鄉飲酒而後科舉預優老尊賢之典於角札呈材之先
豈遂得人而其法宋末猶行殆可笑也池州志建炎後
舉進士者所傳不過五十餘人舉於鄉者所傳不下餘
人不知盡自池州舉否抑多免解而試者否三歲間舉
八人豈落落如是則文獻散湮可知然率多碌碌無奇
節所稱赴鄉飲酒諸公僅若是云爾景德寺迄明已改
府學八桂書院父老未聞獨市中心街到今不易志稱陳
太昌必程大昌無疑嘉定有癸酉癸未而無癸卯此志
誤也附宋程秘畚祈進士修書門竊觀池陽之爲鄆
九華之秀秋浦之綠皆東南清淑之所鍾也其秀者
爲奇偉涵其綠者爲精深秘嘉泰甲子奉校士是邦
多得其雋然尺書往來至今不絕者惟青陽葉君焉今
足下不忘舊好惠然肯顧且復以長書睨之若望秘以
有言者甚矣足下此意之厚而秘之荒疎不足以當之
也雖然竊聞之學者之於道莫先乎務實也以實而求

道則必有所入以資而行道則必有所至。鉏駟剪虛最爲先務。古人云德盛而詞謙。道高而色下。信乎聲色之足以害道也。道與德可尊也。言與貌則不可盛也。由漢以前人皆務實。雖專門之學。世以爲病。然要之人懷實心。專於一經。白首窮年。各有所得。晉唐以來。習氣漸虛。至於近代。則又有專事口說。無復一毫躬行體察之功者。視唐又遠矣。此習不除。凡讀書爲文。應人接物。臨政蒞事。無非驕虛。安得事事當其宜。物物中其理。耶。足下氣淳而質茂。蓋涵秋浦之精深者。其進於道何疑焉。勉之而已。直率之罪。不知所逃也。

湖山樓

當在貢院中。今失其處。見程秘洛水集記。按秘嘉泰甲子嘗校士池州。作湖山樓記。公署因以文傳。

興賢坊

舊志云在製錦里。宋在秀山門外。以有貢院也。今廢。按坊遺址當在今社稷壇前。

秀山驛

在坡上街。元置沈昌詩曰。斜日垂楊古道傍。西風吹角致郵忙。紅塵一騎催星火。過此聲悲驛路長。

馬站坡

卽秀山驛故地。郎璽詩曰。坡上高歌是酒家。三台併峙夕陽斜。漁樵爭渡栖雲嶺。半入城西半水涯。

丘墓

元理問郎禮卿墓

在鴨兒嘴見郡志按人子須知丁水主長壽旺人吳公云兌逢丁水壽同彭子

所見池州府西門外杏花邨郎氏祖地係兌龍丁水明景泰成化出郎鑑郎鉉同胞兄弟及姊妹皆百餘歲云云此即吾鼻祖禮卿公墓也相傳爲司馬頭陀所卜吳仰寬安葬處士吳非有郎禮卿戶牒歌及洪武四年給杏花邨郎禮卿安字二百二號戶牒俱載藝文

明處士郎觀璟墓

在鴨兒嘴觀璟宣德時人曾孫文學子相附葬墓側

王相鄭恕墓

在釣橋西南同邑明經王大爵嘉靖六年志墓

登仕郎郎思舜墓

在弔橋南塢兒嘴有小篆墓碣郎遂曰乙酉歲左夢庚復詭言父良王興晉陽

甲領兵再下江南沿江棺多被發時家君病卧甚篤心竊慮曾王父曾王母兩匱厝江許間必不能免悲號徹

晝夜是時先大父同中丞程公世昌屬羈湖州伯大父
自甲申夏五誓隱山中弗獲與聞諸父畏之却步家君
孑然一身扶病縋城而下從百牙山扶兩隴合葬於杏
花邨是爲夏五月二十六日也棺尚未入壙中忽北兵
森集從池口至弔橋衆俱驚散家君一身撫棺號泣北
兵見之問曰今爲何日家君隨畬爲今夏五月某日尋
兵相謂曰此孝子慈孫也徐給寬慰之語家君撫棺越
二日兵入城少定甫募人深葬焉一時知者咸謂至孝
足以感異類也此固邨中事當附錄之

邨西

名勝

耀龍山

在杜塢亦名杜鵑山。明侍郎孫仁杜鵑山夕照詩曰。水繞山環石磴斜。夕陽明處景偏嘉。翎光刷

雪。投林鷺背影浮金。入樹鴉。日去遠鐘來。埜寺風吹寒

笛出樵家。一從小杜行驂後。艸木長舍幾倍華。淮南

徵士李盤杜鵑山懷杜牧之詩曰。杜公千載後。花鳥曉

風清。遠韻留山水。游人憶姓名。邑人鐫繼杜鵑山與

孔仲石人初眺別詩曰。相慰身存淚。各含池清。同伏興

偏耽。茅茨漸密安。鼈犬符節紛紜擁劇驂。三輔多年非

漢版。兩公前代謝朝簪。豐春所至鋪芳艸。涯石誰同帶

霧探。按仲石翰簡泰華之子。人初閣學玉橫之子。蘭木

人皆高尚不仕著書以終

杜鵑

在邨西四里名勝志曰。貴池杜鵑以刺史杜牧嘗游故名。或曰杜牧遺腹子荀鶴別業在焉。杜荀鶴山

居寄同志詩曰茅齋深僻絕輪蹄門徑緣莎細接溪垂
釣石臺依竹壘待賓茶竈就岩泥風生谷口猿相叫月
照松頭鶴並棲不是無端過時日擬從窗下躡雲梯
按山居當在杜鵑別業但詩中每用仙桂雲梯沾沾仕
進不置似有愧于林泉也明鑑岐杜鵑詩曰未過樊
川曲今來杜鵑中艸平崖泛碧花暖水浮紅乳燕嬌開
尾生魚小半籠河山風不異舟楫恨難通梅山沈昌
引鳩詩曰古鳩何年未著名欣從杜姓共崢嶸漫言五
馬恣游豫頻出郊原爲省挑桐城周蔚杜鵑懷古詩
曰別業誅茅竹作門幽人風韻自爲邨碎聲重影時花
鳥曾到山家壓酒樽清武進林搏雲杜鵑詩曰刺史
遺支遠漁人寄興豪歌聞花畔曲飲縱月山高樂業惟
閒網浮家卽小舫風光常此領不減武陵桃雲間錢
又選杜鵑詩曰散步郊原早尋僧漫曳筇雙禽鳴雪樹
孤寺響烟鐘路轉溪聲斷山圍嵐氣重梅花落未盡春
色挽行踪無錫華黃杜鵑懷古詩曰城西五里杏花
邨邨外青山竹木勻烟火數家皆網戶猿陰一徑到僧
門酒壚時挽游人騎風月還隨刺史轡祇樹清涼幾聲

蘇揚州好夢不重溫。濟源李時杜鵬訪詩僧赤霞詩
曰。滿塢烟光疊彩霞。江天雲樹影交加。自然雅尚尊吾
黨。定擬風流續杜家。水竹香浮三徑。居蘇杯泛一牀
花。禪心詩思無蔬筍。更欲重尋吃趙茶。連江陳元鍾
杜鵬偶成詩曰。梅里如浮水溪淺。山遙隔霧沉。江
干晒網人何在。醉臥垂楊尚未醒。又曰。秋水淵澄清似
玉。晚山黯淡態如癡。上流聞有桃源路。試問漁人總未
知。按山山在江北。杜鵬可望。石埭曹有為杜公鵬懷
古詩曰。小杜風流勝。栖遲烟水邨。杏園移酒肆。梅浦望
柴門。鷗侶應相狎。魚腥可當餐。卜居余有志。茅屋一編
樊。郎遂杜鵬訪荀鶴別業詩曰。極目滄桑感慨多。爲
尋別業到山阿。相逢盡是漁樵侶。烟雨從容挂綠蓑。
又杜鵬訪赤霞上人詩曰。爲訪詩僧到水涯。風高日落
望烟霞。漁翁釣罷閒相問。猶識當年有杜家。
杜湖 卽杜鵬河朔河而入可通秋浦。近人指齊山湖及清
溪爲秋浦誤矣。大名令顧咸泰雨後望杜湖懷友
詩曰。與君分袂冬經夏。歷盡山川韻未窮。白練一條青
澗裏。蒼烟萬點碧湖中。正從雨後看朝翠。更喜河干趁

曉風日日江濱懷楚城。何時共醉月池東。瀘溪令陳
其勳杜湖詩曰。上下烟雲聚。湖光翠欲流。波淘梅嶺脚。
浪激小磯頭。皓月穿松牖。和風送客舟。遙知當日裏。賴
有杜公游。自注梅嶺小磯皆地名。雲間錢又選杜湖
舟中詩曰。出城臨杜鵑。雨歇放孤舟。一水通秋浦。千邨
隔楚洲。萍踪隨意去。鄉客有心愁。相望人烟外。斜陽下
戍樓。建德王爾綱池口阻風換船入杜湖卽事詩曰。
爲阻江間浪。重牽河上風。山連平野綠。水浸遠天紅。月
隱疎林內。旗翻落鰲中。遙憐同伴者。此夜與誰同。邑
人吳非杜湖舟中詩曰。出岸風高送客歸。一船輕上釣
魚磯。菰蒲水泛江通漲。石谷溝流賽薄圍。沈墨怪看天
瘴黑。溼濛濛。霽後月明微。蒿梢不必喧相逐。兩岸谿聲夜
已希。郎垣杜湖贈釣者詩曰。扁舟隨浪逐長河。消受
春風秋雨多。釣得一竿將貰酒。蘆花深處好高歌。郎
遂杜湖泛舟詩曰。意亦思逃暑。因之學泛舟。停橈看絕
壁。繫棹賦中流。楚浪疑飛雪。清風似到秋。飄飄忘所寄。
何事問沉浮。

杜塢渡

在杜塢河每年夏秋間有夜行舟金陵詩人張

悠夜泊杜塢榜人訛稱渡河感而有作詩曰不識
杜公塢徒爲汗漫游昨宵經旅泊明月滿孤舟貴池
處士吳非杜塢夜行船詩曰怒放客舟去相持橫索錢
所居爭各岸及夜渺無天湖濶風通直灣多帆亂縣不
愁來往誤水路識長年又杜湖携兒姪輩舟行抵滙
寄趙客十四韻詩曰最喜風帆快安能如此行移山青
就目歌浪白號聲打鼓催邪許浮鷗請定盟湖瀕漁曬
網木屋牧爲耕在宋通網運于唐以浦名聚江今已寒
舊縣昔曾更陸陸隨曲灘灘逆轉平古牛朝日見梵
馬夕陽迎長往者遲迴別感生藕香消萍盡茶冷
缺瓶傾紙筆兒偏懶竹林姪莫廢遣無心問悶伐又木
丁丁憶爾離方驛吟誰合共鳴一船輕到岸勞復計途
程貴池進士章世德同曹集孔夜舟達杜塢詩曰江
左才名是勝流何緣邂逅附仙舟一圓山月灘聲急兩
岸霜楓樹影稠漁火夜間爭落壩人烟水際却通溝倦
來小枕容身地茆店雞啼杜塢頭

梅林洲

在杜塢隔岸亦作梅裏洲相傳宋元以來梅花極盛因以名之或曰洲與治東相公墩皆地肺也閩

詩人陳元鍾游此擬築寄廬於洲上後寓霍丘有懷舊詩曰曾擬梅林作隱丘。賤詩論史共浮游。待聞歸計个方切。未識山霽許我不。郎遂約孝受築室梅林詩曰。倦游廬只廢垣存。故國烽烟不可論。此日梅林堪共隱。何須極目望家園。自注倦游廬在連江孝受祖一齋公著書處也。附雪浪餘聞紀籬梅一則陳孝受隨父宦游池上一夜夢同鄉孝廉林初文過訪因同步梅花樹下時花盛開及別去林畱詩爲贈曰。常疑人是兩。却看箇中人。攜手梅花下。梅花君後身。陳憶少時亦夢梅花盛開有女子絕美倚梅樹手持花枝與陳極相親嬲臨別陳謂女曰。卿言此花夢耶醒耶女笑謂陳曰。君疑此身人耶鬼耶因指梅索詩爲贈陳于夢中有枝橫雲上下影共月徘徊之句餘不能記猶足成之曰夢爲梅事發梅向夢中開皎潔分明是芳芬仔細猜枝橫雲上下影共月徘徊欲折隴頭寄淒涼隔夜臺蓋補綴夢中語也元鍾字孝受原字孕采福建連江人以文獻世其家

建置

梁昭明廟

在邨西三里卽郡治西也土人亦稱西廟唐末

今所宋賜額曰文孝累封英濟忠顯靈佑王明仍稱昭明有坊有重門有殿有寢室有迴廊有鐘鼓樓規制壯麗儼若宮闕自元迄明歷修皆有碑記可考廟後有梁武帝殿廟左偏爲僧居廟祝周氏亦附居其側世掌祠事池人以八月十五日爲昭明誕辰先期十二日知府率寮屬迎神像入祝聖寺十五日躬致祭十八日送還廟所蓋貴池里社無不祀昭明爲土神者或朱甍飛棟或數椽棲神或片石築壇水旱必禱霽響異常誠福土也唐羅隱宋喻良能汪遠猷曾極黃庭堅俱有詩元鍾世美有碑記詳見藝文 明臨海侯緘重修昭明廟記曰嘉靖辛卯夏四月緘守茲土適奉部院案劄仰承聖天子德諭凡境內神祠載在祀典廟宇傾頽弗稱祀事者咸許動支官錢修理余簡閱會典始知西祠在祀典也庫吏告緘未克相度事事旣而夏六月不雨余禱于

城隍父老請故事兼禱西祠至則重簷峻宇傾頽過半
余竊嘆昔時之壯麗而傷後之弗繼且念神在梁爲天
下儲君而廟宇不蔽風雨神如有知寧不降厲我池民
也耶乃默禱于神曰神能降甘澍以穀我上女余亦能
新神宇以安神棲越三日甘雨果沛稿苗回綠父老咸
歸德于神余因作而嘆曰神真有功德于民則祀之者
與遂捐俸爲諸僚屬倡士民歡傳咸樂趨事或捨木石
或助錢米鳩工集材易舊以新不數月而廟宇落成凡
爲正殿三間梁武殿三間鐘鼓樓二牌樓二迴廊川堂
山門寢室罔不一新丹青金碧煥耀掩映余又作而嘆
曰池民其食德知報可以義感者與神如有知寧不久
福我池民也耶諸父老羣請郡請余樹石記其事時余
方治裝入覲未果癸巳夏同守任君復以父老之請爲
懇緘因贅爲之言曰我聖天子御極圖維化理既嚴守
令之選以牧我民又推西郊餘意以新海內祀典神宇
者祈福民也世或藉此浚民膏脂濫崇淫祠以爲游玩
之所輸其贏餘歸諸黠橐此則慢神虐民真不容誅于
堯舜之世者也余茲舉也上承聖天子明命下順百姓

歡心不動支官庫一錢不數月光復百餘年墜典實神
威霽默相也遂從其請爰敘修廟顛末以紀歲月云
明郡丞鄧縣施應驥昭明廟詩曰太子生平愛貴池
瞻廟貌動遐思法華教闡人知重文選書行世所師因
境昭霽災患息三農藉庇雨暘時功崇報享由來遠歲
歲中秋值誕期武陵給事胡永順昭明廟詩曰沉沉
一廟雜蓬蒿尸祝昭明萬古豪藻米搬來千鳳羽心思
拈出萬牛毛南朝旗鼓登壇舊東府圖書擁價高勝蹟
從今應莫朽雕蟲能不媿吾曹建德王命策題昭明
廟詩曰風物依然古斯人未遽亡觀于池上樂宛在水
中央秋浦饒幽色春宮發異香因知今古事不朽是文
章貴池徵士劉城昭明廟詩曰朱甍圍敗垣高齋猶
自敞伏臘人所矜幽魂有立賞溪清魚正肥山秀色相
兼携我七代書心目相游想濠濮未逍遙華林猶屢懷
夜梵時有無又愜禪供養展謁陳此辭冥霧一拊掌
臨城吳夢虎昭明廟詩曰才高天阻位龍隱鍾鼎出六
字王封寵九郎民庇庶美魚池益貴秀水浦增秋無愧
德施字儲君第一流清錫山華黃西廟懷古詩曰梁

武英雄氣不加桑門蒲塞滿王家獨留太子扶天監力
為儒林護五車又曰文選樓高星漢間新亭風景舊河
山石城秋水年年碧洗盡南朝金粉班崑山王朱王
昭明廟詩曰蕭梁事業已無遺剩有高臺江水瀾風俗
至今秋八月霧旗画鼓動人思和州戴本孝游昭明
廟詩曰秀山門五里梁殿寄千秋空有臺城寺何如文
選樓閣霧傳古祀嘉饗尚時修更許殘僧守荒碑記客
游銅陵余心傳詩曰統系原相屬千秋位自傳遂當
爭立日何以不延年屬意惟秋水棲神近壁烟現身會
駭夢爪髮可安全邑人吳非詩曰到來幽徑異星拜
謝昭明知愛溪山勝傳聞父老更高文稱選體肖像想
平生天定重興後王孫有至情

寓思亭

在西廟右為郡守祁司員建今廢明弘治中學博

秦公祠

在西廟後右偏今廢肖像尚存秦公諱懋義字喻

廟及西湘聖母橋池人因祀之今城南翠微隄亦稱秦
公隄以志遺愛云

杜翰林祠

擬建朱果杜鴈迴瀾菴僧通榮請建唐翰林杜荀鶴祠呈曰爲舉報前賢遺址仰祈采納事前

月憲駕停旌湖上訪杜翰林別業遺蹟一時卹農會皇
失對僧適行脚蘭溪不獲上呈鄙見有負表彰盛心惶
懼無量竊按名勝錄泊郡乘卹志稱治西五里許有荀
鶴別業歲久碑碣不存傳聞多惑近考順治間有行僧
於潛修菴右闢地種蔬掘得舊磚十餘方上有字痕駁
蝕難辨其彷彿可認者爲咸通二字咸通唐懿宗年號
也今以年譜証之荀鶴正懿宗時人至昭宗大順元年
及第嘗讀唐風集有曰竹門茅屋帶卹居又曰杜鴈垂
釣是生涯則別業故址其在杜鴈何疑且此地臨水背
山疎花莖篠不蒔自生或芳艸連阡或平湖噴浪或秋
潦而雁宿沙汀或春至而漁爭古渡或山峰晴日皺來
飄風雙蛾或梅里和風點入湖天一色地畝高士遺踪
景屬詩人本象倘得選勝爲亭署之木主如丘廟之祠
白傳九子之祠青蓮爲釋爲儒千秋掩映荀鶴之靈爽
實式憑焉

杜鵑莊

在杜湖之畔今廢丁昂歸隱處也相國丁紹軾修家乘爲昂作傳曰守備公昂者軾自諸生以至釋

褐所親承其聲教者也公始從先別駕習儒業卽曉暢儒業而氣岍稜嶒不受人羈縻小試不利卽去習武未半年捷取武科第四中隆慶甲子丁卯兩解元甲戌會試第三時范狀元屏麓公主試拔公卷第一極其讚賞因病劇副考填榜置第三范後大嗔遂以中上缺優之得守備汝寧云公抵汝寧考武生故事太守爲政公以嫻文藝出題閱卷了無遜意遂失太守權與文官奕不肯少讓曰此戰局也余武臣何得有敗局不可敗則不可讓人咸目攝之不二年罷歸先是公去汝寧先君贈之六字謙慎爲首又語以尊黃石禮蓋公公不能用也歸而棲遲杜鵑莊上則取魚爲生其取魚卽老於漁者弗能及閱三十餘年無徒業家用饒給有諷之起官者不應人以爲智比陶朱云至所好多黃老道家之言時與方外人持螯爛醉或譚棋長嘯或大叫狂言兀坐則擁姬三五共奕共觴足稱自樂者矣每憶公軀頽然其長貌魁梧俊偉聲音洪亮辨博更從橫斐臺使公掖甲

臨戎當一而可稱桓桓寶臣使出使異域不難叱咤風雲片言而奪之氣而世棄公公亦棄世竟以漁終悲哉陶朱六畜在既遇之後子牙把釣在未遇之先公遇而不遇竟老於漁恐非公志也往賦每侍坐輒虛往實歸聆公之論直令厝大眼孔頓開窮酸習氣一洗今安得起我公九原而再見也公妻白首諸姬肅雍今沒十數年矣而少者及無出者皆與嫡共守育子及婚可觀公家政矣公開吾邑二百年武科之始繼之者紀君元憲今爲征西掛印大將軍則吾家甥也論武於邑羨吾家甥舅焉

杜鵑艸堂

漁人孫昌宅也昌死妻携遺孤適人所著杜鵑集皆散失並絕命詞亦不傳艸堂今已成墟昔

孫昌畬友人過訪艸堂不值詩曰棲遲聊自放策策近湖涯坐听垂楊柳秋潮沒蓼花舟橫羅雀戶簾挂網魚家忽枉諸君駕予方上釣槎又曰紅蓼湖邨寂高軒過水涯釣魚舟隔浦題鳳筆生花四壁相如舍雙屏納子家聞君惆悵返空自悔乘槎喜西樵見過草堂詩曰性癖烟霞懶近人竹籬茅屋傍漁津到來佳客論交舊

把讀高吟命意新。菊未經霜秋正好。身因多病硯生塵。
相畱共坐斜陽下。江獮邨醪不計貧。郎光禮過杜鵑
艸堂贈孫黃裔詩曰。風月江天一主人。壚頭酒熟每邀
賓。交情常帶三分俠。文字從無半點塵。買得琴書堪作
侶。種成松竹好爲隣。相逢喜接蘇門嘯。踏破蒼苔莫厭
頻。江表訪孫黃裔不值詩曰。杜鵑幽人宅。茅檐近水
涯。邨烟渡湖曲。漁網曬籬花。不見孫登嘯。空尋惠遠家。
應知垂釣者。隨意泛仙槎。郎遂引杜鵑漁人有序曰。
杜鵑漁人孫黃裔之別號也。黃裔原名昌。又名登。孫字
嘯。嘯貧而能詩。把釣高吟亦忘乎貧矣。自交吾黨。因從
事舉子業。連不得志。鬱鬱而死。子過湖上。弔之。詩曰。年
年秋老泛漁槎。網挂舟橫意已遐。忽似渡河長不返。無
從烟雨辨鰭鯨。題漁人湖上讀書處詩曰。重臨湖畔
問茅廬。人往風微興亦疎。絕命詞成披筆去。孤兒殘婦
拾遺書。遂注其妻尚未他適。故云。吳源出輓杜鵑孫
黃裔有序曰。悲夫孫子黃裔。何其不壽而早逝也。豈天
之困斯人。故如是耶。余素未與孫子交。常於杏邨。郎子
知其生平大概。其爲人也。好讀書。有出塵之姿。每應童

子試不錄心無稍懈。籀誦之暇輒垂綸以自適。其韻吟甚富。易簣時付之詩僧。赤霞者不下數百首。惜乎其志未遂。終抱憾而死也。悲夫。詩曰：垂綸豈必向人同。牛馬憑呼爾固窮。已負生平空此志。時非獨問菊花叢。又曰：此中樂事竟何如。著述湖濱與世疎。猶憶閒吟常自適。歡迎佳客摘園蔬。

迴瀾菴

在杜塢瀕湖。按郡邑志：皆稱潛修菴。詩僧通叅嘗居之。杜塢釣徒孫昌晚秋同友人過訪迴瀾菴。詩僧曰：何處黃花好。晴郊開未曾。相尋携勝友。乘興訪詩僧。

堃寺多編竹。方塘罷採菱。一杆貪角勝。歸路暮烟凝。

春日過迴瀾菴。晤陶質也。詩曰：桃花開遍柳依依。燕子乘風社後飛。堃艸似烟迷水岬。山光如黛對柴扉。逃禪

處士休辭醉。招隱詩僧尚未歸。相對雲房興不淺。高吟長嘯足忘機。

西溪胡桂過迴瀾菴。贈赤霞上人。詩曰：春深鶯老路無花。同訪招提到水涯。解脫有僧如惠遠。

博綜無客不張華。詩成座上工難和。酒泛湖頭興更嘉。一笑虎溪歸路晚。不須畱意學餐霞。鐫筵塗游迴瀾菴。卽事詩曰：此地名傳是杜家。斷烟荒艸舊桑麻。因穿

竹徑尋僧侶。但聽鐘聲感物華。坐久共沉元亮酒。談深
還覓趙州茶。不妨典盡歸來晚。一路江天看落霞。釋
通粲畲友人過湖上菴詩曰。茅菴臨水竹籬遮。剝啄無
聲絕市譁。却有高人來問渡。不妨呼酒坐移花。風團柳
絮堆殘雪。門接江湖帶落霞。醉後百篇驚滿座。解醒頻
喚煮山茶。郎遂同友人宿迴瀾菴卽事詩曰。秋水浮
歸棹。遊人羈上方。高談因借箸。共醉許連牀。月到庭梧
靜。風敲檻竹涼。不堪蛩四壁。相對惜韶光。又迴瀾菴
訪詩僧赤霞不值詩曰。踏遍春郊上釣船。爲尋竹院共
畱連。折蘆知爾乘雲渡。掃碣惟予識寺年。靜對谿山仍
擁戶。寂無松鶴與棲禪。興來索墨應題壁。回首城西起
暮烟。

水神廟

在迴瀾菴前祀楚三閭大夫今廢

河泊所

賈池有三一在杜鵑河濱嘉靖間裁革署亦廢烏
落洲之楊家塗諸地皆隸此所明初楊仲賢諸氏

漁戶之首也誠意伯劉基有送姚伯淵之池陽河泊所
詩

古蹟

文選閣

在西廟正寢殿右今遺址尚存順治己亥司李錢黯擬重建貯文選版因海兵犯池未果此古蹟之最著者亟宜修復之唐羅隱宋李廌俱有詩見藝文邑貢士劉廷璣文選閣記曰文選自周迄梁世歷八朝類兼衆體詩書而後典章備焉不獨修詞之家奉爲軌則然擇之良有弗精是以蘇子瞻顯論其失而儒者詆爲綺靡過矣漢魏以來諸制作可繁謂之繁縟耶詞人訝其不錄蘭亭序篇謬矣過江佳麗刪拾幾何述作之旨可盡臆斷耶是書之傳本昭明東宮所撰次茂齡早彫是正者寡選之不足盡斯文也固宜揚州志稱引大業拾遺記曰梁昭明文選樓隋煬帝嘗登眺焉相傳今城內太平橋北旗忠寺乃其址舊名文選巷是也楊用修病榻手吹記集文選人名云昭明太子統聚文士劉孝威庾肩吾徐防江伯操孔敬通惠子悅徐陵王瓘孔爍鮑至十人謂之高齋十學士共集文選今襄陽有文選樓池州有文選臺未知何地爲的但十人姓名人多

不知故特著之楊但致疑於襄陽池州固絕不及揚州矣今吾池郭西五里昭明廟額存焉文選臺惟祀石在古老曰梁以降祠墓在秀山唐永泰中始建斯廟及入明朝洪武正統天順弘治嘉靖凡六七修門寢壯麗比諸闕宮貌以沉水香肖之自梁武丁貴嬪簡文元帝蔡妃豫章枝江諸王及諸侍從宮僚釋寶誌傅大士各肖一像別從其寢不同室而受藻蘋不共牢而享粢醴朝廷沿累代故事歲遣內臣秋仲展廟惟虔其神靈雩祭必應又嘗陰召米船救池饑饉以昭明嗜食貴池魚故內臣成祀而回者舟載香鮓貢於上以爲額內臣好事者自肖飾其形祔侍廟東西側黠者則擾於有司有司久而患之池州縉紳請於上罷遣內臣歲命有司遵故事秋仲祭謁如禮其後八月十二日郡人多戴面具推肱刺械引頸貫刀幡幢羽葆窮極綺靡號爲七聖二郎其餘城社及一二百里外鄉曲叢祀土木偶莫不輿至稽首昭明廟以迎神是日有司禱祝畢導昭明像鳳蓋華旗輦御郡景德寺若法駕然十五日是其誕辰景德寺故其外家地也至十八日有司以下送神如前儀惟

罷祀以後香鯽不生廟門達寢殿三里許画棟雕楹飛
鳬傑宇剏衛長廊深達重廡齋祀有庖展謁有室丹雘
赫然輦張鱗次文選閣貯文選鏤版遠近薦繁無虛日
不啻武當九子補陀宋世謂之九郎廟九郎昭明也相
傳昭明作文選於茲廟後小丘其花園地唐石甌一竈
一宋敕封一元陽書一廟祝周姓世居祠外其來已久
元守鍾世美碑一碑陰元同知張奉政載祀田甚詳祝
去其籍猶有漫滅可稽者嘉靖後江西巨商私致禱忽
竊神元首以去僧雖補其缺畧然非沉水香廟貌亦自
是類不復振半歸莽莽間不特一文選閣朱勅藏周祝
帷幕上天啓七年燬焉古老之言如此元以來諸碑碣
皆據梁書南史爲文以昭明未嘗蒞池而池有昭明諸
跡如釣臺如香鯽蕩如隱山寺手書額如花園累累顯
著或卽梁武未受禪所爲誤以相屬或諸王子勃營等
之國所經追先飲痛立此遺跡以寓招魂此所謂求其
說而不得者然諸碑碣之言皆如此緜按昭明引納才
學之士聚書東宮史無專指大抵如韋叡任昉徐勉許
懋賀瑒徐摘其人若本傳所述劉孝綽徐勉周捨陸襄

者特就議禮而言徐勉傳所述蕭宏沈約張充王瑩張
稷柳澄王暕者特就講孝經而言劉孝綽傳所述殷芸
陸倕王筠到洽者特就樂賢堂管記而言惟南史庾肩
吾傳肩吾初爲晉安王國常侍府在雍州被命與劉孝
威江伯操孔敬通申子悅徐昉徐摛王固孔燦鮑至等
十人鈔撰衆籍號高齋學士王爲皇太子肩吾兼東宮
通事舍人晉安王簡文也雍州襄陽也用修著書每取
腹笥將母以晉安王後爲皇太子訛而稱昭明太子乎
昭明最敬者無如何胤最愛者無如劉孝綽所賓禮者
諸傳連類而外尚有明山賓庾仲容劉孝儀劉孝陵張
纘殷鈞劉勰諸人文選之成未必不相沓定然以昭明
之學之筆恒自討論篇籍則揆輒是書亦其餘工昭明
生於襄陽自孩提入石頭未嘗復幸襄陽襄陽必無文
選樓有之是晉安王事也昭明由襄陽江州至秣陵年
三歲立爲太子其後居永福省臨決庶事出宮二十餘
年游幸不一而足池州時稱石城邑屬宣城城實武
帝初封梁國國內郡史或止以畿甸視之如鍾山講解
之類略而不別書且王筠哀冊有晉游漳滏賓從無憐

之句劉孝綽集序有晏游西園祖道清洛之句豈區區
國學玄圃足盡今華玄駟之輪哉池州去京邑四百里
非襄陽比池州文選臺庸詎無之但後人以之貯錢版
則易臺而名閣也亦宜嘉魚入饌不必臨池而餐恐其
先石城魚亦有貢貢而被賞遂賚貴池名封不可知昭
明以齊中興元年九月生謂八月望誕者既非丁貴贈
祖居襄陽沔北五里邨寓劉惠明廡下父道遷初爲歷
陽太守後位宣城太守謂其外家在景德寺者亦恍惚
之辭而七聖二郎在南宋杭州已見無亦里中秋社適
逢其會而牽合之耶九郎之號甚俚陸務觀入蜀來游
斯廟已著是稱而不解其故彼元碑疑爲泰山神次者
何誕且迂耶石瓶今已習爲籤筒瑩徹可愛俗云本有
二而後失之鱸甚巨琢而黜其質之爲陶爲石不能辯
唐物奚疑榜碣則姓名燦列祝周姓食祠田而不供春
秋之典虛若無人初族姓蘇今食指不數屈偶讀宋張
邦基墨莊漫錄曰池陽郭西英濟王祠祀昭明太子也
其祝周氏自唐開成年掌祠事至今其子孫分八家悉
爲祝也然後知周祝系始於唐豈非神之縣其祥使歷

代不易居耶陸務觀所記言僧而不言祝爾時祝已不相闕如今日耶昭明自有不磨之性在書傳在丹青在山川民社之間亦奚以封敕爲耶昭明旣來游涉則釣臺有徵陸務觀據僧語云秀山產鯉金鱗朱尾若然鯉也香鯽蕩何稱焉訊之父老土人皆云香鯽也然則記游一時之筆誠有不足徵信者耶隱山手書云吳師道有記廟後花園郡志相沿豈盡誣且安耶以爲梁武相國事傳之昭明理當有之若諸王子兵戈搶攘骨肉多殘萬萬不暇爲昭明立遺跡夫文選未必不成於池然安知昭明之不嘗至池耶昭明同母弟簡文著太子別傳二卷記起居必詳宋如池州趙彥博亦著太子事實二卷記廟食于池靈響必應吾聞太子所至似通德之門顓華陰之市當羣賢鴈咏記貴池景物必詳惜皆佚不傳繼近得里人吳彥文選本乃大德九年池州同知張伯顏所刊余連序曰梁昭明享池祀豈偶然哉如有所爲者知其有文選也又曰伯都司憲新文選之梓于燼越十有三載梓陷災轍張正卿復斯集云然則元以前池州梓文選貯文選蓋與昭明之祀同沿於梁久矣

無惑乎其文選臺也易臺而名閣不知何年吾因之
福清林古度文選樓詩曰秋浦樓過文選樓隋梁勝跡
在池州細看萬事皆虛往不及昭明姓字留桐城周
蔚文選樓詩曰熟君文選薄輕衣百尺高樓世所依若
把華林家法用宏詞博學與時違劉廷鑑九日訪文
選樓故址詩曰梁家帝子到林丘此地猶傳文選樓石
鏤斷殘學士姓銅屏僅見老僧游衣冠故塚山中在廟
食無魚池上秋向道登高能作賦講堂前席邈難儔
晉江陳寶鑰文選閣詩有序曰兩漢不得不六朝也猶
六朝不得不入大家也氣運使然質者豈爲功文者烏
足罪耶雖然綺麗傷意流連傷情繁蕪並陳瑜瑕不掩
而大雅于是乎闕矣登斯閣者得無嘆濫觴之首乎抑
有說焉士必窮愁而後著書若富貴場中人聞愁嘆聲
則曰彼咄咄者何爲乎昭明生帝王家習見華靡宜其
厭淳而喜紛也詩曰都從字句巧爭奇六代芳華此一時
任等孟軻也詩曰都從字句巧爭奇六代芳華此一時
錦卽成裘需碎後金當躍冷孰陶之風翻蜩蚪明窗入
夜喚蟬魚古壁知摘去樓梯深歲月心精未許旁人知

又曰名山藏實豈藏虛美市都成忠孝餘僞晉未刪令
伯語劇泰多錄子雲書乾坤一鏡懸孤榻今古雙珠照
石渠此日濫觴都散盡總緣繁蕪兆丘墟宛平汪元
綬文選閣詩曰青宮弘睿藻開閣對名山萬古文章地
諸峰錦繡環簪纓隨扈從風雨失丹顏重建檻櫓煥輝
聯星斗間餘杭嚴曾架憶池陽文選樓送宗鶴問官
其地詩曰高樓迥與白雲連名自蕭梁太子傳六代繁
華長已矣千秋風雅尚依然幾餘陳跡空江上忽爾懷
人落燭邊知向池陽官舍近著書安肯讓前賢江都
吳綺前題詩曰西風吹雁度江濱送客還疑遠望真地
藉文章傳勝蹟天留臺榭與才人池魚入饌羹香美山
鶴聞琴舞態新到日樓頭應有憶不須鄉夢往來頻
秦中王賓前題詩曰文選樓空鎖暮烟郊西明月尚依
然大江忽憶池陽好舊跡還因帝子傳數百里中雲影
接一千年後墨光連少文此去攀佳勝如在邗關古寺
邊石埭曹有爲文選樓懷古詩曰樓高瞻帝子想見
戀烟鬟宮闕非梁代衣冠冷秀山魚嘉宜易號文選散
重刪地勝仍如昔英風定往還

麗景樓

當與文選閣相近見檢討方謨碑記今不存

花園

在文孝廟後相傳為梁昭明游觀之處今廢銅陵武進士郎應徵訪文選臺花園諸遺址詩曰臺荒周廢已多時名自梁傳址尚遺池乘相沿成古蹟我來指授老僧知

獨柱坊

在文孝廟神道前按壁間石刻謂唐永泰三年仙人所建至明隆慶六年信官章彬募衆重修云云

石柱及橫木尚存藤蘿旋繞雲間聽秋子取而圖而之

雙眼井

在文孝廟前左偏相傳初建廟時湧出大木數株至今父老嘗述其事

宋封康盧二將軍勅碑

在文孝廟左偏藏荆棘中文剝蝕難讀有可辨者碑額康盧將軍敕

封六大字楷書中間大書尚書省省下一字莫辨為行艸書下方序次加封條法合當從建炎三年併淳熙十四年云云文孝廟供神康太保合崇封二字將軍今擬靈翊將軍盧太尉今擬靈濟將軍為小楷左方又大書

奉敕賜靈翊靈濟斷文爲行艸

紫石碑

在文孝廟前右偏碑勒昭明庥庇池事甚悉日久殿宇頽廢碑露風雨中石光瑩潔紫彩奪目誠異

觀也游覽詞人多咏之明貴池布衣陳常題紫石碑

詩曰西廟流鐫石一方欲垂不朽祀蕭梁繡成晶嶺嶠紋赤織就鵝溪繡黃藤古花香堪戀蝶春淡艸茁怪

芻羊縱教風雨頻催折愈有函關紫氣翔邵文學郎

光禪過西廟覽紫石碑詩曰紫霞一片色蒼蒼壑口栽

成繭絹黃風雨漸磨蟲篆蝕薜蘿猶帶墨痕香道傍墮

淚非關峴石上畱題且說梁當日亭臺今盡廢荒烟堊

外共淒涼遂按石樓遺稿此詩未載

宋崇寧褒封敕

宣和二年建德尉張昇摹本刻于西廟前熙中郡守袁說友又取真蹟龕置神殿側

見元吳師道隱山寺碑記

丘墓

明中憲大夫陳鈇墓

在上杜鵑耀龍山有坊表今廢按鈇字公錫登正德舒芬榜進士御史仕

昭之孫爲吾族祖贈參軍銓公之快婿也歷官主政至袁州郡守以養親歸里邑志有傳列之賢哲

周金和尚墓

在西廟前金自少林來居九華東岩值王陽明再登九華金謁之陽明贈之偈云不向小

林面壁却來九子看山錫杖打翻龍虎隻履踏倒巉岩這個潑皮和尚如何畱在世間呵呵會得時與你一棒會不得時且放在黑漆桶裏偷閒嘉靖戊子金自九華還羅漢寺一日告衆僧曰千聖本不差彌陀是釋迦問我還鄉路日午坐牛車語畢跣跌而逝

桐城汪守川夫婦合墓

在勦兒嶺子孫家于江北而墓在江南崇禎司宮詹方拱乾表之

清詩人孫嘯嘯墓

在杜鵑吳非有墓銘曰漁邪詩邪長嘯而呼誰邪人乎天平吾爲之銘名以存